



**BIDZE GOVERNMAN SESEL
Pour Lannen Finansyer 2020**

Tenm: "Rezilta Ekitab-Prosperite Partaze"

Delivre par:

Anbasader Maurice Loustau-Lalanne

MINISTER FINANS, KOMERS, LENVESTISMAN EK PLANIFIKASYON EKONOMIK

Dan Lasanble Nasyonal Sesel

Ile Du Port, Victoria, Mahe, Seychelles

Zedi le 31 Oktob, 2019

9.00 er bomaten

LATAB KONTENI

	Paz
1. LENTRODIKSYON	4
2. APERSI ZENERAL LO LEKONOMI AN 2019 E DAN MWAYEN TERM	
2.1. Apersi	4
2.2. 2019 an konteks	4
2.3. Prozeksyon 2020 e dan Mwayen Term	5
3. PERFORMANS BIDZE 2019	5
4. PROZEKSYON POUR LANNEN FINANSYER 2020	6
4.1. Lobzektif Primer	6
4.2. Reveni	6
4.3. Depans Gouvernman	6
4.4. Reminerasyon ek Saler	7
5. DEPANS DAN SA SIS PILYE TEMATIK NDS 2019-2023	8
5.1. Bon Gouvernans	9
5.2. Dimoun o sant Devlopman	9
5.3. Koezyon Sosyal	10
5.3.1. Sekter Lakaz ek Later	10
5.3.2. Kominote	11
5.3.3. Lar, Kiltir ek Leritaz	11
5.3.4. Lazenek ek Sport	12
5.4. Transformasyon Ekonomik	12
5.4.1. Sekter Transpor	12
5.4.2. Sekter Lenerzi	13
5.4.3. Lagrikiltir, Lapes ek Lekonomi Ble	14
5.5. Lekonomi Inovativ	15
5.6. Soutenabilite Lanvironnman ek Rezilyans	16
6. BIDZE 2020 POUR PROGRAMM SOSYAL	17
7. DEPANS ENPREVI	17
8. NOUVO POLISI DAN BIDZE 2019	18
8.1. Logmantasyon dan Saler Minimonm	18
8.2. Logmantasyon dan bann Benefis ek bann Programm Aproveu Kot Lazans ek Proteksyon Sosyal	18
8.3. Pansyon Minimonm SR 1,000	18
8.4. Pansyon Kategori Spesyal SR 500 pour en group retirete	18
8.5. Lasistans Deker ek 'Child Minding'	19
8.6. Propozisyon pour en alawenns pour bann manman ansent ki reste lo zil pros ki bezwen akous Mahe	19
8.7. Konze Anyel	19
8.8. Ler Travay Fleksib dan Gouvernman	19
8.9. Revi Skim Sibvansyon pour Lakaz	19
8.9.1. Pour revwar to par met kare lo sa trwa zil prensipal	20
8.9.2. Pour enkli rekonstriksyon lakaz anba anba laplikasyon pour sibvansyon lakaz	20

	Paz
8.9.3. Pour enkli lavant later avek propriyete dan kriter pour kalifye pour sibvansyon lakaz	20
8.9.4. Pour revwar nivo reveni pour kalifye pour sibvansyon lakaz	20
8.10. Nimero Veikil Personnalize	20
8.11. Nouvo Kategori Permi Travay	21
8.12. Legzanmpsyon Pansyon Prive anba Dezyenm 'Schedule' Lakt Taks Reveni ek Benefis Non-Monneter	21
8.13. Revi Benefis Non-Monneter anba katriyenm 'Schedule' Lakt Taks Reveni ek Benefis Non-Monneter	22
8.14. Taks lo Propriyete Imobilye	22
8.15. Revizyon dan Alawenns Personnel pour Lapos ek Kourye ki san taks	22
8.16. Revizyon dan Taks Veikil	23
8.17. Lamannman Ozone dan Regilasyon Proteksyon Lanvironnman 2010	23
8.18. Sanzman dan striktir taks pour labwason alkolize	23
8.19. Reform Taks Biznes	24
9. LEZOT REFORM EK LOPORTINITE DAN BANN SEKTER KLE	27
9.1. Devlopman Sekter Finansyel	27
9.2. Devlopman Sekter Prive	29
10. PROZE ZIL PROS	32
11. LANTREPRIZ PIBLIK	32
12. RESANSMAN POPILASYON EK LOZMAN 2020	32
13. KONKLIZYON	33

Rezimen Diskour Bidze pour Lannen Finansyer 2020

1. LENTRODIKSYON

Msye Spiker,
Onorab Lider Lopoziyon,
Onorab Lider Biznes Gouvernman,
Onorab Manm Lasanble Nasyonal,
Pep Seselwa.

Bonzour

Msye Spiker, le 5 Out 2019, Gouvernman ti lans Vizyon 2033 pour transform Sesel koman “En nasyon Seselwa rezilyan, responsab, e prosper ki an bonn sante, edike e emansipe, e ki pe viv ansanm dan larmoni avek lanatir, e angaze avek leres lemond.” Lansman sa Vizyon pli long term, I fer nou konstate ki nou bezwen get pli lwen ki mwayen term e fer sir kwa ki nou oule atenn koman en nasyon dan sa prosen 15 an.

Vizyon 2033 ti ganny fer koman en partenarya ant gouvernman, sosyete sivil, sekter prive, kominote enternasyonal e bann diferan group dan nou sosyete. Donk, pour transmet Vizyon 2033 dan realite i pou en responsabilite kolektif.

Nou pei i reste vilnerab vizavi bann sok ekstern, espesyalman dan sa moman krisyel kot krwasans kontinyel dan lekonomi global ki pe maske en logmantasyon dan bann risk ki kapab potansyelman ogmant bann defi devlopman dan bokou parti lemond. Donk, nou bezwen kontinyen travay ansanm pour asire ki nou rezilyan, e trouv en solisyon komen pour sa bann defi.

Msye Spiker, bidze 2020 in ganny formile otour sa sis pilye tematik Stratezi Devlopman Nasyonal (SDN). Msye Spiker, se dan sa loptik ki nou swazir sa tenm “Rezilta Ekitab-Prosperite Partaze” pour Bidze 2020. Pour Bidze 2020, baze lo konsiltasyon avek Lasanble Nasyonal, nou pou fer provizyon en kopi elektronik selman.

2. APERSI ZENERAL LO LEKONOMI AN 2019 E DAN MWAYEN TERM

2.1. Apersi

Dapre ‘Outlook’ Lekonomi Mondyal an Oktob 2019, krwasans global in reste ase ba. Bann sif pour Prodwi Domestik Brit (GDP) ziska prezan, i montre en aktivite global ki’n plito pli feb ki ti’n antisipe. Krwasans global in ganny predir lo 3.0 poursan an 2019, e i ekspekte amelyore e mont lo 3.4 poursan an 2020.

2.2. 2019 an Konteks

Msye Spiker, dan konteks Sesel, krwasans Prodwi Domestik Brit reel pour 2019 in ganny revise pli o lo 3.9 poursan konpare ek estimasyon inisyale ki ti 3.5 poursan letan bidze ti pe ganny prepare. Moter prensipal deryer sa previzyon favorab i sekter Manifaktir labwason ek sigaret. Ver dezyenm kar 2019, prodiksyon gines ek labyer ti 21 ek 12 poursan respektivman. En logmantasyon dan

aktivite tourizm, ki pilye mazer lekonomi Sesel, pe osi kontribye ver en revizyon pli favorab, avek bann larive viziter ki'n ogmante par 5 poursan ver le 20 Oktob 2019 letan nou konpar lannen pase ek sa lannen. Sekter Tourizm in antisipe agrandi par 5 poursan an 2019, konpare ek sa prediksyon inisyal, 4 poursan. Logmantasyon kontinyel dan lizaz data ek demann pour servis enternet pe ogmant krwasans dan sekter lenformasyon ek telekominikasyon, avek en prediksyon zeneral 7 poursan. Sa sekter in reste rezilyan pandan sa dernyen senk an, e i pe antisipe reste solid dan mwayen term avek lenstalasyon en dezyenm kab soumaren. Finalman, sekter konstruksyon in remonte an 2019, an vi plizyer proze lakaz gouvrenman, ek lagrandisman Danm La Gogue, renovasyon lotel Ste. Anne, ensi ki lezot proze ki ankor pe kontinyen depi lannen 2018. Sa in anmenn en logmantasyon dan fabrikasyon prodwi konkret ek ros, e donk donn en apersi pozitiv pour sa sekter osi. Bann tel logmantasyon dan aktivite ekonomik i natirelman ogmant demann pour elektrisite ek delo parey nou'n vwar dan par en krwasans 8 poursan an mwayenn dan sa sekter.

2.3. 2020 Prozeksyon 2020 e dan Mwayen Term

Pour 2020, krwasans i reste pozitiv lo 3.5 poursan, pouse par aktivite kontinyel dan sekter lenformasyon ek telekominikasyon avek en krwasans 5 poursan. Tourizm, kontribiter prensipal dan Prodwi Domestik Brit (GDP), pou ede soutenir krwasans avek en prediksyon krwasans 5 poursan an zeneral. Larive touris i antisipe ogmante swivan lanons ki Air France, pe rekomans son bann vol Sesel, e frekans vol Qatar Airways pour vin 14 vol par semenn an Avril 2020. An plis, Air Seychelles pou komans al Tel Aviv, e sa i ava ede ogmant bann larive touris plis. Aktivite dan sekter konstruksyon pou kontinyen pandan 2020 ki a donk siport plis krwasans.

Avek en lenflasyon pli ba ki ti'n prevwar inisyalman lo en mwayenn 12 mwan, sorti 2.2 pour 2.0 poursan, e avek en to lesanz pli favorab kont Ero ek Dolar ki ti'n inisyalman antisipe, krwasans Prodwi Domestik Brit nominal ki ti'n prezimen in ganny revize pli ba par 0.3 poursan, konpare avek revizyon Mars 2019. Sa in bes previzyon Prodwi Domestik Brit Nominal en pti pe, pour ariv SR 24.4 bilyon.

Dan mwayen term, krwasans in ganny predir lo en mwayenn 4 poursan. Bann moter prensipal deryer krwasans i reste tourizm, lenformasyon ek telekominikasyon, ensi ki sekter finansyel ek lasirans.

3. PERFORMANS BIDZE 2019

Msye Spiker, Gouvrenman in prevwar en balans primer SR 583.9 milyon ouwsa 2.5% Prodwi Domestik Brit (GDP) a lafen 2019. Reveni Taks i ekspekte anliny avek bidze inisyal, avek selman SR 5.9 milyon an plis, e en pti diminisyon dan taks biznes, ki a ganny balanse par plis taks reveni personnel. Sepandan, reveni ki pa sorti dan taks i SR 50.3 milyon par anba bidze orizinal. Sonm total ki ekspekte kolekte an Don an 2019 pou SR 64.2 milyon par anba bidze inisyal.

An vi bann depans, Gouvrenman in propoz en bidze siplemanter an Oktob 2019, avek en seving total SR 125.6 milyon oubyen 0.5% 'GDP'. Donk, prediksyon se ki depans pou pli ba. Seving mazer in ganny fer dan peyman ek saler a en sonm SR 52.0 milyon e dan bann servis ek byen a en sonm SR 26.8 milyon.

Msye Spiker, ti annan en serten kantite diskisyon ki'n ganny fer vizavi sezisman bidze dan legzersis revu mi-term bidze. Anlany avok seksyon 26 Lakt Zesyon Finans Piblik, i donn Minis responsab pou Finans pouvwar pou;

1. Met restriksyon lo lizaz en apwopriasyon par en zofisye ki responsab sa depans;
2. Limit lizaz en apwopriasyon si i ganny zistifye par kondisyon ekonomik ou fiskal, oubyen si rezon pou ki sa apwopriasyon ti ganny fer i nepli valab.

4. PROZEKSYON POUR LANNEN FINANSYER 2020

4.1 Lobzektif Primer

Msye Spiker, Gouvernman i reste angaze pou atenn en balans fiskal 2.5% 'GDP' pou lannen 2020. Sa target i a permet nou realiz nou target pou redwir nou det par 50% 'GDP' ver 2021. Sepandan, dernyen prozeksyon i endike ki nou det pou ariv 51.7% GDP ver 2021. Sa i akoz noun donn en garanti adisyonnal lavalan 30 milyon dolar Air Seychelles. Me nou pou travay pandan 2020 pou nou asire ki nou realiz nou target pou redwir nou det par 50% GDP ver 2021.

4.2 Reveni

Msye Spiker, pou lannen 2020, nou pe prozekte reveni total, enkli bann don, pou ogmante sorti SR 8.8 bilyon dan bidze revize 2019 pou vin SR 9.9 bilyon an 2020. Ladan, SR 7.73 bilyon i reveni taks, ki reprezant 78.4% koleksyon reveni total. En total SR 1.48 bilyon in ganny prozekte pou reveni ki pa sorti dan taks e SR 647 milyon an term don.

4.3 Depans Gouvernman

Pou lannen 2020, Gouvernman pe propoz en prozedlwa bidze pou SR 9.29 bilyon ki pe ganny finanse par 88.9% sorti dan resours domestik, 4.1% dan finansman lón e 7.0% finansman don.

Msye Spiker, sekter ledikasyon ek lasante i reste priyorite, avok pli gran parti bidze, ek en alokasyon total SR 1.18 bilyon e SR 1.12 bilyon respetivman ki reprezant en total 24.7% pou sa de sekter ansanm dan bidze total. Msye Spiker, sa de sekter in kontribye enormeman anver en lendeks pou kapital imen pou Sesel ki ekselan.

Msye Spiker, prosedir tennder pou Sistenn Lenformasyon Entegre pou Lasante in konplete e i aktyelman dan faz negosyasyon kontra. Nou ekspekte ki kontra i a sinyen avan lafen sa lannen. Kan Gouvernman i etabli en Sistenn Lenformasyon entegre pou Lasante, i pe donn son langzman pou lamelyorasyon dan kalite swen lasante, efikasite servis, ek akse, tandis ki sistenn swen lasante i ganny armonize pou vin pli pre avok bann standar enternasyonal. O sant sa proze i lenplimantasyon en solisyon pou en sistenn elektronik entegre pou rikord medikal ki a kouver 100% popilasyon Sesel. Bi segonder sa proze se pou kree en lyen ant Sistenn Lenformasyon Lasante avok bann divers sistenn gouvernman elektronik ki egziste nasyonalman (par egzamp. rezis nesans ek lanmor) pou amelyor lenplimantasyon bann regilasyon ki annan pou fer avok lasante e proses fer desizyon stratejik lo nivo nasyonal pou rezon planifikasyon.

Dan kad Proze Kapital, plizyer minister ek lazans pe fer fas avok bann lanpesman mazer dan lenplimantasyon zot bann proze respektiv. Gouvernman i annan en plan devlopman lenfrastruktir ki ase anbisye, ensi ki en serten kantite lenfrastruktir ki pe avarye, e ki donk bezwen en

lentervansyon konsiderab. Koman en mezir tanporer, Gouvernman in rekrit travayer etranze pour asiste avek sa kantite proze ki annan pour konplete. Posibilite pour rekrit lekspertiz lokal i ankor tre difisil, an vi ki i pa posib pour Gouvernman vin pli kompetitiv ki sekte prive. An plis ki sa, i en fe ki bann zofisye proze gouvernman pa ganny drwa fer travay prive, vi ki proze gouvernman i demann bokou letan ek swen, e donk, i meyer ki zot pa diviz zot latansyon ant travay prive ek travay gouvernman. Nou'n vwar ki sa i afekte lefikasite servis, ki vedir sa mezir i nesese pour ki gouvernman i atenn son target konm fodre.

4.4 Reminerasyon ek Saler

Msye Spiker, en somm SR 3.0 bilyon ki ekivalan 12.3% 'GDP' in ganny prevwar pour Reminerasyon ek Saler. Sa i reprezant en logmantasyon SR 382.6 milyon oubyen 15% konpare ek bidze revize 2019.

Msye Spiker, en bidze total SR 81.4 milyon in ganny prevwar pour reminerasyon ek saler dan kad revizyon bann skim servis an 2020, ensi ki lenpakt total lenplimantasyon skim servis 2019 pandan lannen.

Sa bann skim swivan pou ganny revize apartir Zanvye 2020;

- Lazans Transpor lo Later; Travayer koltar
- Zofisye Proze dan bann Minister, Departman e Lazans
- Prokirer Zeneral – Prosekiter Piblik
- Minister Ledikasyon ek Devlopman Resours Imen – Direkter ek Depite direkter Lekol, kad Biblioteker
- Departman Imigrasyon ek Stati Sivil
- Departman Zafer Etranzer; Kad Diplomantik pour bann Misyon Diplomantik Aletranze ek Drayver Protokol
- Lezislav; Seksyon Parlyamanter e Sekretariat
- Departman Risk e Menazman Dezas; Kad Risk e Menazman Dezas

Skim pou Minister Lanvironnman, Lenerzi ek Sanzman Klima pou ganny revize apartir Mars 2020 e Skim Zidisyer pou ganny revize apartir Avril 2020. Adisyonnelman, skim pou Biro Standar Sesel pou ganny enplimante a parti Zilyet 2020.

Skim saler pou bann ners ti ganny revize an 2018 letan Governman ti etrodwir en 'retention' alawens SR 3,000 par mwan e revwar zot kalkilasyon gratite. Alors pandan lannen 2020, nou pou fer en travay pou revwar zot saler de baz pou enplimant konmansman 2021.

Adisyonnelman, Gouvernman i annan lentansyon revwar kad sipor komen an 2021. Sa i enkli kad Resours Imen, Ladministrasyon ek sekreter. Malgre ki sa bann skim in ganny revwar an 2018, i annan en nesese pour rekonsider zot avek bi pour atir e retenir bann striktir sipor de kalite dan bann diferan lorganizasyon, ki krisyel si nou oule ki bann lorganizasyon gouvernman i mars byen.

Msye Spiker, pour lannen 2019, i annan en provizyon dan bidze pour enplimant logmantasyon saler par 5% apartir Avril 2019. An 2020, lenplikasyon pour lenplimantasyon sa logmantasyon saler 5% pour lannen antye i en total SR 74.4 milyon. Adisyonnelman, nou'n komans

lenplimantasyon alawenns long servis depi Zilyet 2019. Sa pou annan lenplikasyon pour lannen antye ki ariv en sonm SR 103.8 milyon dan bidze 2020. An plis, anliny avek lanons Prezidan an Oktob 2019 ki Skim Alawenns Long Servis pour Anplwaye Gouvernman ki ti ganny entrodwir an Zilyet 2019, pou vin aplikab pour bann anplwaye Komisyon Servis Piblik ek bann kontra Lazans apartir le premye Zanvy 2020. Sa pou kout SR 18.9 milyon dan bidze 2020. Adisyonnelman, alawenns long servis pour bann ‘housekeepers’ ki pe travay avek Korperativ Kliner, e bann zofisye sekirite ki pe travay avek younit VVIP e osi bann travayer menntenens pou ganny zot alawenns long servis apartir zour ki zot ti komans travay dan Gouvernman. Msye Spiker, fodre note ki napa taks reveni lo alawenns long servis.

Msye Spiker, abilite Gouvernman pour retenir son lafors travay e atir lezot travayer avek kalifikasyon apropiye pour zwenn servis piblik in vin enn pli gran priyorite depi reform 2008. En rapor dyagnostik ki’n fokaliz lo performans servis piblik ek performans zesyon dan Sesel ti ganny fer boner sa lannen par Labank Mondyal. An zeneral ti ganny obzerve ki servis piblik dan Sesel i mars relativman byen, an servan bann model ki familye e plizoumwenn tradisyonnell. Ti osi fer resorti, sepandan, ki nou servis piblik i bezwen en bon ranforsisman pour fer li vin pli performan.

Servis ti ganny persevwar koman pa apropiye pour son manda an term dimansyon, vi ki dan plizyer domenn, bann staf egzistan ek skil ki zot annan pa pe ganny servi efektivman. Vot pour saler komn en parti GDP pe kontinyelman ogmante. Sa pou fer annan mwens lespas pour reform lapey ek reform gradasyon. Adisyonnelman, data 2013 i montre ki saler dan sekter prive i 20% pli ba, malgre ki dan bann pozisyon zesyon sinyor, profesyonnel e teknisyen, dan sekter prive i relativman pli o. Fonksyon resours imen gouvernman e son manda, rol ek responsabilite DPA, i ganny persevwar koman bezwen reform, e sa i enkli sistenm egzistan pour lapey ek benefis. Kot i konsern polisi saler, sa resers i rekonnet restriktirasyon grid saler an 2013 koman en amelyorasyon lo sa ki ti egziste avan. Sepandan, in met lanfaz lo lakantite alawenns ki ganny determinen par skim servis, ki malgre i konvenyan dan kourt term, i riske fer sistenm lapey vin mwenn transparan, redwir par ki devret relye avek performans e ankouraz en kiltir ‘entitlement’ ki pa an faver zesyon ki baze lo rezilta. Fodre note ki aktyelman i annan 216 skim servis dan gouvernman. Lanfaz in ganny mete osi lo nesessite pour sorti lo sistenm tradisyonnell ladministrasyon zesyon resours imen e bouz ver en ladministrasyon ki oriyante ver rezilta, dan servis piblik ek reform sekter piblik. Sistenm delegasyon avek bann MDAs ki aktyelman anplas in ganny vwar koman sifizan pour lemoman, me kapab ganny aforsi anmezir ki sistenm zesyon baze lo rezilte i devlope.

An sa ki konsern polisi saler, nou bezwen reviz nou model ladopsyon skim servis e travay lo enn ki met lanfaz lo konpetans ek performans. Adisyonnelman, nou kapab devlop en nouvo model progresyon karyer ki mwenn depandan lo promosyon, me plito met lanfaz lo skil travay ek formasyon, leksperyans varye ek mobilite. Gouvernman pou donk pe analiz sa bann rekomandasyon e prezant bann opsyon polisi pour nou kapab progresse.

5. DEPANS DAN SA SIS PILYE TEMATIK SDN 2019-2023

Msye Spiker, Stratezi Devlopman Nasyonal (SDN) 2019-2023, ki premye letap dan enplimantasyon Vizyon 2033, in ganny formile otour sis pilye tematik. Mon pou donn en lendikasyon alokasyon bidze otour sa sis pilye tematik.

5.1. Bon Gouvernans

Msye Spiker, bon gouvernans i esansyel pour asir en fondasyon solid pour lape ek prosperite, ki an retour i ouver laport pour devlopman soutenab. Dan bidze 2020, en total SR 221.8 milyon in ganny prevwar pour bann diferan lenstitisyon endepandan, konm swivan:

- Zidisyer SR 102.0 milyon
- Lezislativ SR 43.0 milyon
- Biro Oditer Zeneral SR 21.3 milyon
- Biro Onmboudsmenn SR 3.8 milyon
- Lotorite Lapwentman Konstitisyonnel SR 2.1 milyon
- Komisyon Elektoral SR 8.9 milyon
- Komisyon Antikoripsyon SR 19.0 milyon
- Komisyon Laverite, Rekonsilyasyon ek Linite Nasyonal SR 12.1 milyon
- Komisyon Etik pour Zofisye Servis Piblik SR 3.0 milyon
- Komisyon Drwa Imen Sesel SR 6.7 milyon

Sa i montre ou konmyen nou demokrasi i koute. Mon konsyan ki demann ki'n sorti kot bann lenstitisyon ti bokou plis, me sependan, nou'n kapab fer provizyon pour sa bann fon ki mon'n fek masyonnen. Sa i reprezant en logmantasyon SR 26.6 milyon oubyen 13.6 % konpare ek bidze revize an 2019.

Msye Spiker, adisyonnelman, nou'n fer en provizyon SR 15 milyon pour bann depans ki annan pour fer avek egzekisyon eleksyon Prezidansyel an 2020.

5.2. Dimoun o sant Devlopman

Msye Spiker, anmezir ki Sesel i angaz avek leres lemonn, nou pei i bezwen en rezo travayer tre kalifye e kreativ, ki kapab ogmant produktivite travay ek krwasans ekonomik. Lazans Nasyonal pour Devlopman Resours Imen, ki'n ganny en alokasyon SR 205.2 milyon dan bidze, pou zwe en rol kle dan realizasyon sa stratezi. Sa lazans pou travay etrwatman avek Minister Ledikasyon ek Devlopman Resours Imen, ensi ki Departman Lanplwa, pour asire ki Sekter Ledikasyon i fer provizyon neseseur pour bann skil ki bezwen dan marse lanplwa..

Pandan 2019, nou'n akey 95 ek 104 'graduates' sorti dan bann liniversite aletranze ek Liniversite Sesel respektivman. Sa nonm pou ogmante an 2020, vi ki nou pe ekspekte ankor 238 'graduates'. Adisyonnelman, baze lo bidze 2020, Lazans Nasyonal pour Devlopman Resours Imen i ekspekte ofer 358 labours dan diferan domenn letid.

Parey Prezidan in masyonnen dan son diskour Leta Lanasyon an 2018, "i annan en neseseur pour pli byen prepar nou lazenes depi zenn, pour donn zot konesans ek konpetans neseseur pour pli byen entegre zot dan sekter ekonomik". I tre enportan ki Gouvernman adopte en lapros sistenn ouver, e an menm tan reste stratezik vizavi bann reform ledikasyon ek formasyon. Sa i a permet nou sirmont sa bann defi e pli byen ekip bann zenn Seselwa pour benefisye dan krwasans ekonomik nou pei. Gouvernman in komans prosedir pour etablir en nouvo Lekol Teknik e Vokasyonnel an servan kadreman Partenarya Piblik e Prive (PPP).

Lekol Teknikal Nasyonal ki'n ganny propoze anba plan aktyel i annan lentansyon pran etidyan sorti dan santye 'General and Skills' ki deza egziste e ki mars ansanm avek santye 'Academic and Technical' dan tou lekol segonder, nivo S4 ek S5. Leksperyans in montre ki i difisil pour melanz sa de santye dan menm lekol, parske in kree en diversifikasyon bann resours kritik ek en melanz misyon. Donk, sa nouvo lekol Teknikal Nasyonal i annan lentansyon anmenn lanmwatye sa bann etidyan dan en lekol spesyalize. Lobzektif se ki sa nouvo lekol, ki pou baze Ile Soleil, i a vin operasyonnel pa pli tar ki 2022.

Msye Spiker, nouvo lekol pour Lakademi Letid Biznes Sesel ek Lenstiti pour Lar ek 'Design' pou ganny konstrir lo Ile Aurore. Sa proze pou al lo tennder an 2020. En provizyon SR 27.9 milyon in ganny fer dan bidze 2020.

Msye Spiker, nou'n fer en lot alokasyon SR 10 milyon pour 'Unemployment Relief Scheme' e SR 3.1 milyon pour program 'reskilling' pour lanplwa.

Msye Spiker, loportinite pour nou lazenes etidye i la – napa limit lo zot laspirasyon, e zot merit pran sa bann loportinite e servi zot dan zot devlopman, pour pran bann job kalifye ki pe ganny kree dan pei.

5.3 Koezyon Sosyal

Msye Spiker, karande poursan dan bidze total ki'n propoze i pour ledikasyon, lasante ek portfolyo zafer lafanmir, ki reprezant 16.0% 'GDP'. Dan sa bann dernyen semenn, ti annan bokou ki'n ganny dir lo bann 'Benefits and Approved Programmes' Lazans Proteksyon Sosyal. Dan bidze 2020, sa pou ariv en total SR 1.49 bilyon ki reprezant en logmantasyon SR 100.5 milyon oubyen 7% konpare avek bidze revize 2019. Msye Spiker, dan sa alokasyon total SR 1.49 bilyon, SR 1.28 bilyon oubyen 88 poursan i pour bann benefis retret, benefis invalidite, benefis dezabilite e skim 'home carers'. Donk, i annan tre pe posibilite pour fer seving an vi nou popilasyon ki pe vyeyi. Me selman, nou pe fer zefor pour rasyonnaliz bann fonksyon ek program dan domenn servis sosyal, avek bi pour ogmant efikasite dan performans servis, e fer seving.

5.3.1. Sekter Later ek Lakaz

Msye Spiker, later ek lakaz i reste en priyorite pour gouvrenman. Depandan lo disponibilite resours, nou'n kapab donn 188 fanmir zot lakle lakaz depi Zanvyé ziska lafen Oktob 2019. Nou ekspekte ki ankor 152 fanmir pou ganny zot lakle avan lafen Desanm 2019. Adisyonnelman, nou ekspekte ki pandan 2020, ankor 209 fanmir pou resevwar zot lakle. Kot in konsern later, nou pou fer alokasyon 175 kare pandan 2019 e nou ekspekte konplet lenfrastruktir pour deservi apepre 286 kare pandan 2020.

Msye Spiker, an 2020 en bidze total SR 97.1 milyon in ganny prevwar anba Minister Labita, Lenfrastruktir ek Transpor lo Later pour devlopman bann proze later ek lakaz. Sepandan, sa pa pou ase. Gouvrenman pou bezwen finans bann proze pour ankor lavalé SR 200 milyon atraver Korporasyon Zesyon Propriyete. Sa pou ganny fer atraver en bond ki nou ekspekte 'PMC' i a met alaporte piblik an Zanvyé 2020, pour 5an, avek en to lenteré 5%. Repeyman a ganny fer atraver bidze.

Gouvernman pou servi SR 40 milyon dan sa SR 200 milyon pou aste proze lakaz Ile Perseverance avek Fon Pansyon. Sa proze i konpri 24 apartman 2 lasanm ek 18 apartman en lasanm a en kout SR 68.5 milyon. Proze i ekspekte konplete ver lafen Novanm 2019. Balans fon pou ganny finanse atraver lón ki sak 'graduate' endividyel pou peye a en pri SR 1.2 milyon par younit. Sa 18 apartman en lasanm pou ganny servi par 'PMC' pour lwe avek bann 'graduates' a en pri rezonnab SR 6,000 par mwan pandan premye faz, anmezir ki zot esper swa en konndominyonm oubyen en kare later avek gouvernman.

Sa nouvo bond SR 200 milyon pou osi ganny servi pour finans ranplasman bann tayls twa lakaz ki 'PMC' pe kordinen.

5.3.2. Kominote

Msye Spiker, pandan 2019, Departman Gouvernman Lokal i ekspekte konplet 210 pti proze kominoter pour en lavalè SR 27.4 milyon. En lot SR 30 milyon in ganny prevwar an 2020 pour bann pti proze kominoter. Adisyonnelman, SR 9.2 milyon in ganny prevwar an 2020 pour bann pti proze dirzans ki ase miner.

Sa bann sant deker pou ganny konplete sa lannen dan bidze 2019 bidze;

- Deker Anse Aux Pins
- Deker Glacis
- Deker Takamaka
- Deker Grand Anse Praslin

Adisyonnelman, nou pou servi finansman ki disponib anba 'Grant' Pti Proze Devlopman', finanse par Gouvernman Lenn, pour konstri sant deker dan sa bann distrik swivan;

- Cascade
- English River
- Grand Anse Mahe
- Ile Perseverance
- Les Mamelles
- Roche Caiman

Sa i ava bann nouvo loportinite biznes pour bann operater Seselwa.

5.3.3 Lar, Kiltir ek Leritaz

Msye Spiker, ban diferan antite ek departman anba sekter Lar, Kiltir ek Leritaz in resevwar en alokasyon total SR 153.7 milyon. Adisyonnelman, Gouvernman in fer provizyon SR 0.5 milyon ek SR 1 milyon anba Skim Leritaz Sesel, e 'Trust Fund' pour Kiltir ek Lar respektivman.

En Polisi Nasyonal pour donn 'grants' dan domenn Lar ek Kiltir pou ganny entrodwir e i pou efektif an Zanvye 2020. Nouvo Polisi Kiltirel Nasyonal i met lanfaz lo lenportans pour ankouraz kreativite artistik pour anrisir kiltir Seselwa e promouvwar bann prodwi ek servis kiltirel aletranze. Sa Polisi 'Grant' i annan pour bi ankouraz plis koezyon sosyal ek devlopman ekonomik.

En sonm SR 1 milyon in ganny prevwar pour Konsey Nasyonal pour Lar (NAC), pour stimil e devlop kapasite bann sekter lar dan Sesel. Sa 'grant' 'NAC' i ava donn sipor bann artis ek

lasosyasyon lar pour anmenn lar dan bann kominote, pour angaz avek dimoun, enspir zot e kree bann leksperyans partaze ki a permet dimoun konekte ek kanmarad.

Nou pou fer provizyon fon neserer pour bann proze ki promouvwar, devlop e prezerv lar dan Sesel, espesyalman bann proze ki:

- Devlop tou laform lar;
- Devlop kapasite bann artis;
- Promouvwar vizibilite domenn lar;
- Kree loportinite atraver domenn lar
- Promouvwar sanzman ek lentervansyon ki kontribye dan en fason pozitiv dan bann kominote.

An 2020, nou pou komemor 250^{enn} laniverser depi ki bann premye zabitan ti ariv Sesel. The Komite Nasyonal pour Preparasyon 250^{enn} laniverser Sesel pe organize en seri aktivite lo nivo nasyonal e dan tou distrik, avek en provizyon SR 5 milyon dan bidze 2020.

5.3.4 Lazenes ek Sport

Departman Lazenes ek Sport, ek Konsey Nasyonal pour Sport in resevwar SR 9.2 milyon e SR 77.7 milyon respektivman. Msye Spiker, nou'n vwar sikse nou bann atlet pandan Zwe Losean Endyen 2019. Nou bezwen kontinyen fer disponib resours pour amelyor bann fasilite sport ki egziste aktyelman e antrenn nou bann atlet pour permet zot fer konpetisyon lo nivo enternasyonal. Dan bidze 2020, nou'n fer provizyon pour nou atlet prepare pour Zwe Olenpik Tokyo 2020, e pour organiz "Zwe Lespwar" an 2020.

Konsey Nasyonal pour Lazenes in resevwar en alokasyon SR 28.2 milyon pour ki sa Konsey i kontinyen desarz e zwe zot rol dan pei.

5.4. Transformasyon Ekonomik

Msye Spiker, ler nou get nou lekonomi dan mwayen term, nou bezwen asire ki nou transform nou lekonomi pour en krwasans soutenab e en prosperite partaze. Serten bann sekter kle ki pou enplike dan sa transformasyon i konm swivan;

5.4.1. Sekter Transpor

Nou'n prevwar SR 85.2 milyon dan bidze 2020 anba Lazans Transpor lo Later pour bann diferan proze lenfrastruktir semen. Lazans Transpor lo Later (SLTA) pou kontinyen enplimant son 'Master Plan' pour zesyon trafik dan Victoria par faz, pour amelyor sirkilasyon trafik dan Victoria e otour li. Aktyelman, konstruksyon en trwazyennm koulwar lo Laveni Senk Zen pe ganny enplimante. Sa i sipoze konplete ver lafen 2019, e nou ekspekte vwar en rediksyon dan konzasyon trafik, espesyalman kot ron trafik 'Independence House' e bann semen ki konekte avek li. Ron trafik ki konekte bann semen Bois De Rose pe fonksyon byen, e proze pou kontinyen ziska Roche Caiman. Semen sorti Eden Island pou al ankouri zón endistriyel Providans pou ganny agrandi pour permet plis sirkilasyon trafik. Lezot proze enportan ki form parti 'Victoria Master Plan' ki SLTA pou enplimante i, bann pon pyeton parlao semen pour separ trafik pyeton ek veikil, permet pli bon

sirkilasyon trafik, e amelyor sekirite pyeton. Adisyonnelman, proze pour en ‘dual carriageway’ sorti Perseverance pour al Ile Du Port ek lasose i dan plan mwayen term.

Msye Spiker, reabilitasyon e lagrandisman Por Komersyal Victoria i aktyelman dan son staz planifye, e nou ekspekte ki proze i ava al lo tennder an Zanvye 2020 avek en dat komansman endikativ pour konstriksiyon an Zen 2020. Lotorite Por Sesel i konsidere ki lenvestisman dan bann lenfrastruktir, fasilite ek lekkipman bann por i enn bann eleman pli enportan dan son stratezi long term pour vin konpetitiv e pour reste soutenab. An 2020, Lotorite Por Sesel pou mentenir son stratezi pour investir dan lenfrastruktir ek lekkipman por. Se pour sa rezon ki en alokasyon SR 109.2 milyon in ganny fer, prensipalman dan sa bann proze swivan;

- Realokasyon landrwa pour ouver konntener kot Eks Gard Lakot
- Batiman Terminal Pasaze ek lenfrastruktir lo Zil Eve
- Realinyman miray lo lasose La Digue par 150 met
- Prokirman en bato pilot 40 tonn
- Prokirman en bato pilot
- Amelyorasyon dan sistenm zesyon por enformatik

Lotorite Lavyasyasyon Sivil Sesel (SCAA) pou dan son senkyenm lannen lenplimantasyon son plan lenvestisman senk an. SCAA in donk kapab servi son profi reteni pour realiz son bann proze kapital a en sonm SR 237.7 milyon, e ladan, SR 59.8 milyon ti ganny servi an 2019. Pandan 2020 SCAA pe anvizaze investir SR 103 milyon koman lenvestisman kapital.

Pwen fokal pou prensipalman lo bann proze lenfrastruktir tel ki nouvo blok lofis SCAA, reamenazman bann terminal e restriktirasyon semen pour amelyor mouvman trafik. Adisyonnelman, SCAA pou kontinyen son bann proze lenfrastruktir ‘airside’ ki ariv en sonm SR 17.7 milyon. Sa i enkli mannevre bann landrwa reparasyon ek ekstansyon, amelyorasyon bann drenaz kote Nor erport, konblaz later pour RESA e bann travay ‘piling’ pour bann ‘pontoon’ ki deservi bann bato softaz.

SCAA pou osi investir dan ranplasman software zesyon trafik dan ler a en sonm SR 26 milyon pour kouver lekkipman sirveyans ek lezot servis kle dan nou lespas aeryen ki kritik. An plis, SCAA pou investir SR 16.3 milyon dan son lenfrastruktir rezo Lenformasyon, Kominikasyon ek Teknolozi.

5.4.2 Sekter Lenerzi

Msye Spiker, PUC pe al antreprann divers proze a en sonm SR 348.9 milyon ki pou finanse swa par PUC li menm oubyen anba ‘grant’ devlopman gouvènmman.

Bann koupir kouran ki bann rezidan La Digue ti eksperyansé pandan Out ek Septanm ti finalman ganny rezourd ver lafen Septanm. Koman en Gouvènmman, nou bezwen met anplas lefrastruktir neserer, pour asire ki sa bann enteripsyon pa ariv ankor. PUC in fer provizyon en sistenm zenerater ki pou lo stennbay La Digue, a en kout SR 21.7 milyon. Adisyonnelman, Gouvènmman pe diskit finalizasyon en lón lavalèr US\$ 10 milyon ki ekivalan 143 milyon rounpi avek Fòn Abu Dhabi ki pou servi pour enstal en trwazyenm kab, pour ki kan enn pa pe marse, sa de lezot i kapab kontinyen donn sa zil elektrisite.

PUC in osi komans proze pour redwir nivo tapaz kot stasyon elektrisite Baie Ste Anne, e pour amelyor sistenm vantilasyon. Sa pou kout SR 47.2 milyon. Proze pou konplete an 2020.

PUC in komans enstal bann miter elektrisite priped kot serten lakour selekte lo Zil Perseverance depi semenn pase. I annan 190 fanmir vilnerab atraver Mahé, Praslin ek La Digue ki pe ganny lasistans Lazans Proteksyon Sosyal pour pey zot bil elektrisite. Se zot bann premye fanmir ki pou benefisyè avèk sa servis.

5.4.3 Lagrikiltir, Lapes ek Lekonomi Ble

Msyè Spiker, apre enn an, nou kapab dir ki Plan Konpreansiv Lagrikiltir pe byen progresse. 380 ektar later lagrikiltir in ganny arpante e divize an 564 kare later, e ladan, 436 kare later in deza ganny met a dispozisyon fermye. Gouvènmman in deza met anplas bann mekanizm pour permet fermye ek peser ki'n anrezistre pour ganny ranbourse VAT lo bann lekipman ek bann byen ki zot in aste lokalman, spesifikman pour lizaz dan zot biznes.

Dan bidze 2020, Gouvènmman in prevwar SR 30.8 milyon e SR 41.1 milyon pour Lazans Nasyonal pour Biosekirite, e Lazans Lagrikiltir Sesel respektivman. Lazans Lagrikiltir Sesel pou kontinyen investir dan nouvo semen laferm ek proze irigasyon dan bann distrik, dan bidze 2020.

Kot i konsèrn sèkter lapès, le 22 Oktob 2019, Gouvènmman ek Linyon Ewopean in konklir negosyasyon pour en nouvo Lagreman Partenarya pour Lapes Soutenab avèk en nouvo Protokol ki pou ranforsi zot korperasyon dan domenn lapès pour sa prosen si-z-an. Sa lagreman i mark e letap enportan dan korperasyon bilateral ant Gouvènmman ek Linyon Ewopean dan domenn lapès, e i montre zot langazman pour promouvwar lizaz soutenab nou bann resours maren. Baze lo en referans tonnaz 50 mil tonn, Linyon Ewopean pou donn Sesel en kontribisyon 5.3 milyon Ero ki ekivalan 89.5 milyon rounpi anyelman. En parti enportan sa kontribisyon, 2.8 milyon Ero ki ekivalan 47.3 milyon rounpi par an, pou servi spesifikman pour promouvwar zesyon soutenab lapès dan Sesel, osibyèn ki pour sipòrt devlopman bann pti proze lapès. Valer total ki'n estimen pour dirasyon sa protokol, enkli kontribisyon bann propriyèter bato, i ariv 58.2 milyon Ero ouswa SR 982.4 milyon, ki ekivalan 9.7 milyon Ero ouswa SR 163.7 milyon par an. Pour premye fwa, peyman bann propriyèter bato Linyon Ewopean pou osi enkli en 'dedicated Fund' ki Sesel pou met anplas, pour amelyor zesyon lanvironnman ek lobzervasyon bann ekosistènm marin ki dan nou delo.

Msyè Spiker, nou pe antisipe konplet premye faz lenfrastruktir Ile Du Port dan premye kar 2020, e sa pou kout SR 29.6 milyon. Nou pe travay lo dezyenn faz sa proze, ki pou kout SR 87.5 milyon an total, prensipalman pour bann travay semen, drenaz ek travay elektrisite. Prosedir tennder pour komansè pandan 2020.

Msyè Spiker, reveni sorti dan 'Blue Bond' pou kontinyen finans plizyèr proze anba 'Blue Grant Fund' anba SEYCATT ek 'Blue Investment Fund' ki pe ganny zere par DBS. Pandan 2019, SEYCATT in finans plizyèr 'grant' anba 'Blue Grant Fund' ki konpri;

- 7 proze Pti ek Mwayen ki ariv en sonm SR 0.7 milyon
- 4 gran proze ki ariv SR 2.4 milyon

I osi annan 12 gran proze lavalier SR 10.6 milyon ki pe ganny evalye. Menm prosedir pou swiv pandan 2020 vi ki pou annan 0.5 milyon dolar ameriken ek 2 milyon dolar ameriken ki pou disponib anba SEYCATT ek DBS respektivman.

5.5. Lekonomi Inovativ

Msye Spiker, lasyans, teknolozi ek inovasyon i bann moter enportan pour devlopman ekonomik. Nou bezwen rod nouvo fason fer biznes pour asire ki nou reste rezilyan e protez nou devlopman.

Msye Spiker, an 2019, Labank Mondyal in antreprann de resers dyagnostik; enn lo Gouvernman elektronik, e lot lo Lekonomi elektronik dan Sesel. Bann rekomandasyon sorti dan sa bann resers i ava itil vizavi bann amelyorasyon ki bezwen fer, afen ki sa departman i a pli byen delivre son manda. An 2020, target se pour met anplas bann servis elektronik enteraksyonnel (oubyen e-services) dan menm zanr ki'n ganny fer pour Lotorite Planing ensi ki pour lenplimantasyon Stratezi Sibersekirite Nasyonal. Lenplimantasyon bann rekomandasyon dan sa bann rapor, ensi ki bann desizyon ki gouvernman in deza pran, i vedir ki pou bezwen annan nouvo fason fer dan striktir ek pratik travay sa departman. Sa i enkli pour met anplas en regilater endepandan pour sekter brodkasting ek kominikasyon. Travay pe kontinyen lo nouvo lezislasyon, ki pou ranplas Lakt Brodkasting ek Telekominikasyon, 2000. Sa nouvo lezislasyon pou separ fonksyon leta ek bann aktivite regilatwar.

Departman Teknolozi Lenformasyon ek Kominikasyon (DICT) in osi antrepran en nouvo plan pour entrodwir 5G e in donn 'spectrum' frekans radio avek de operater mobayl pour deplwayman rezo 5G. I ekspekte ki provizyon servis 5G ava komanse an 2020. Fodre note ki 5G i senkyenm zenerasyon teknolozi rezo mobil e i permet transfer en gran kantite data bokou pli vit, i konekte en gran kantite laparey efektifman, e i tret bann tre gran volim data avek minimonm retar. 5G i ekspekte konekte dimoun, keksoz, data, laplikasyon, sistenm transport, e ganny servi dan 'Internet of Things' dan bann lanvironnman smart ki annan en bon rezo koneksyon. Donk, 5G i devret annan en lenpakt enportan lo performans operasyonnel, e donn bann itilizater en leksperyans siperyer. An plis ki 'broadband' mobayl, i osi ekspekte ki 5G ava ganny servi pour fer provizyon akse 'broadband' fiks, e sa ava ede pour amelyor penetrasyon 'broadband' dan Sesel; vi ki 5G i en sistenm 'wireless', i pou osi kapab ariv dan bann landrwa kot rezo kab kominikasyon pa kapab arive aktyelman.

Dezyenm proze kab soumaren i an plen faz lenplimantasyon, e son serve anba lanmer pou komanse dan premye mwatye 2020. Sistenm PEACE i ekspekte vin operasyonnel dan milye 2021. Stasyon 'Cable Landing' pour sa sistenm pou sitye Perseverance. Gouvernman in osi resaman aprouv en proze pour lenstalasyon ek loperasyon en trwazyenm sistenm kab soumaren par en operater lokal, pour donn plis konektivite enternasyonal. I ekspekte alor, ki dan fitir pros, Sesel pou konekte pa selman par de me par trwa kab soumaren.

Msye Spiker, avek bann nouvo devlopman, partikilyerman dan sekter mobayl ek sistenm kab soumaren, ki pou ogmant konektivite ek disponibilite 'bandwidth', i bezwen annan bann meyer e pli konpetitiv dan pri pour sa bann servis, espesyalman pour mobayl ek data, ki ankor ganny konsidere koman tre ser, konpare avek menm servis lo bann laliny fiks.

5.6. Soutenabilite Lanvironnman ek Rezilyans

Sesel i en sanpyon dan konservasyon, prezervasyon ek proteksyon nou lanvironnman natirel, menm si nou kontinyen devlope koman en nasyon. Diversifikasyon nou sours lenerzi i osi tre enportan pour nou mentenir nou rezilyans an vi ki nou aktyelman depan preski antyerman lo lenportansyon karbiran fosil pour elekrisite.

Msye Spiker, koman en Gouvernman, nou bezwen donn legzanp. Dorenavan, Gouvernman pou aste zis bann veikil ibrid oubuyen elektrik. Sa i ava osi form parti plan Gouvernman pour ranplas bann veikil konvansyonnel ki dan lizaz aktyelman.

Msye Spiker, nou pou reste lo bon vwa dan nou zefor pour et parmi bann premye ki entrodwir en fasilite ‘floating utility scale Photovoltaic plant’ lo lanmer, dan lemonn. Gouvernman pe aktyelman evalye bann propozisyon teknik sis lakonpanyen ki’n met zot bid. Swivan sa, bann bid finansyel i ava ouver e ganny evalye. Gouvernman i ekspekte anonse lekel ki’n ganny bid avan lafen lannen, e nou ekspekte konstriksyon komanse dan premye kar 2020, prosedir komisyon in ganny planifye pour ver lafen 2020.

Adisyonnelman, sa de proze fotovoltaiik ki PUC pe antreprann lo Ile De Romainville in ariv en staz avanse dan son konstriksyon, e i ekspekte ki zot a gany komisyonnen dan premye mwatye 2020. Enn pou annan kapasite 5 megawat, e i pe ganny parsyelman finanse par Fon Devlopman Abu Dhabi e parsyelman par PUC, e i pe kout 3.43 milyon dolar ameriken ki ekivalan SR 49 milyon. Lot pou annan kapasite 1 megawat, e i pe finanse par en konponan ‘grant’ Repiblik Lenn, ki enkli 944 KW bann panel fotovoltaiik pour twa lakaz (apepre 150 inite) ki’n ganny enstale sirplas pour bann fanmir ki tonm dan kad reveni ba, e lo batiman gouvernman.

Plan devlopman lenerzi renouvlab, mitigasyon sanzman klima ek adaptasyon i reste tre o lo azanda gouvernman. Msye Spiker, Gouvernman in devlop en Plan Zesyon Lakot pour 2019 – 2023 avek lasistans bann partener enternasyonal kle, ki annan pour bi mentenir e protez zón lakot pour redwir risk lo lakot, siport lasante bann lekosistenm, e permet annan devlopman ekonomik soutenab lo lakot. Lenplimantasyon sa plan pou kout 15.8 milyon dolar ameriken ouswa SR 225.9 milyon. Gouvernman i aktyelman an diskisyon avek bann partener enternasyonal pour travay lo en stratezi finansman pour Plan Zesyon Lakot.

Nouvo Polisi Nasyonal pour Salte ti ganny aprouve an Desanm 2018. Bi sa polisi se pour met anplas en lankadreman pour fasilite lenplikasyon gouvernman, sekter prive e piblik an zeneral dan sekter zesyon salte e ankouraz lizaz efikas bann resours an edan piblik fer bann meyer desizyon lo ki mannyer pour zere e dispoz zot salte. Lobzektif sa polisi se pour minimiz lakantite salte ki ganny anmenn konblaz, an ankourazan dimoun pour minimiz zot lakantite salte atraver kanpanny 3R (redwir, reservi, resikle), e ogmant kapasite bann lenstitisyon etatik e non-etatik pour zer zot salte.

I annan ankor lezot linisyativ aktyelman ki pe ganny antreprann, ansanm avek bann partener enternasyonal, ki enkli

- En proze Labank mondyal dan Sesel ki pe dokimant lenfrastriktir zesyon salte solid pour konpran lenpakt dezas lo zesyon salte solid lo lakot ek lo lenfrastriktir. Son bi se pour ofer en dyagnostik ki kapab definir bann lentervansyon potansyel dan kad reform polisi, opsyon

alternativ pour mitigasyon bann risk asosye avek klima ek letan, ensi ki ranforsisman kapasite enstitisyonnèl pour zer sa bann risk. Sa letid pe servi en lapros miltisektoral entegre e 'holistic' pour ankouraz en fason pran desizyon ki enformen, e target langazman bann partiprenan.

- Paralelman, Linyon Eropeen pe siport Gouvernman dan preparasyon en 'Master Plan' pour salte solid ki pou asire ki zesyon salte solid i ganny antreprann dan en fason entegre, atraver meyer polisi, lenfrastruktir e kapasite (finansman ek resours imen) pour enplimant bann program zesyon salte ki koresponn avek bezwen pei pour sa prosen 25an.

6. BIDZE 2020 POUR PROGRAMM SOSYAL

Dan bidze 2020, Gouvernman pou mentenir son langazman pour finans bann program sosyal ki target bann dimoun pli vinerab dan nou sosyete. Bidze pour bann divers program i konm swivan:

- SR 47.8 milyon pour 'Safety Net' Sosyal par Lazans pour Proteksyon Sosyal (ASP),
- SR 5 milyon skim 'Home Improvement/Re-roofing' pour pansyoner atraver HFC,
- SR 10 milyon skim 'Vulnerable Home Repair' atraver ASP,
- SR 28 milyon pour konsesyon voyaz SPTC travel pour bann dimoun aze, etidyan ek dimoun dezabilite, atraver ASP
- SR 18 milyon skim lasistans lakaz,
- SR 4.2 milyon 'dedicated funds' pour lekòl
- SR 6.7 milyon skim Deker, e
- SR 3.2 milyon skim 'Foster Care'
- Skim transport bann zil pros pour etidyan, referans medikal ek pansyoner, ki ariv en total SR 5.7 milyon
- SR 1.5 milyon skim lasistans 'Emergency Housing'
- SR 292 milyon pour 'Home Carers' ki enkli zot 13enm mwan saler.

7. DEPANS ENPREVI

Msye Spiker, pour lannen 2020, nou'n prevwar SR 45 milyon pour bann depans enprevi. Ladan, SR 37.5 milyon i pou konpansasyon bann ka polisyon delo La Misere. Nou pou komans pey premye group endividi ki'n ganny peye avan konm swivan;

- a) Rezidan adilt ek zanfàn par lao 7 an SR 50, 000
- b) Zanfàn aze 7 an e pli ba SR 15, 000
- c) Etidyan lekòl La Misere SR 25, 000
- d) Etidyan ek staf Lakademi Tourizm Sesel SR 25, 000

Msye Spiker, sa to ki'n mansyonnen pou ganny kalkile baze lo sa SR 37.5 milyon ki disponib an 2020, e larestan pou ganny peye an 2021. Si bidze i permet, en peyman siplemanter pou ganny fer pandan legzersis revè milye lannen. An sa ki konsèrn dezyenm group endividi, travay i ankor pe kontinyen pour finaliz lalis. Gouvernman in kalkil en peryod pour termin sa legzersis ziska Mars 2020. Adisyonnèlman, peyman pou ganny fer pour bann endividi ki'n ganny afekte par polisyon dyezel dan premye kar 2020.

En lot konpansasyon ki tonm anba depans enprevi i bann ka ki konsèrn bann dimoun ki reste kot landrwa ki prodwi koltar Petit Paris. Sa pou ganny finalize pandan premye sis mwan 2020, e

peyman pou ganny fer dek ki prosedir in konplete. Aktyelman, i annan 34 dimoun ki'n reklanm sa konpansasyon.

Msye Spiker, lot group ki pe atann konpansasyon i bann rezidan Baie Ste Anne Praslin ki'n ganny afekte par stasyon elektrisite. Sa i en ka depi 2017. Nou oule fer sir ki nou ferm sa ka dan premye sis mwan an 2020.

8. NOUVO POLISI DAN BIDZE 2020

8.1 Logmantasyon dan Saler Minimom

Parey Prezidan ti anonse pour Lafet Travayer, saler minimom pou ogmante par SR 500 par mwan, e sa pou vin efektif apartir le premye Zanvyé 2020. Sa i pou ekivalan konm swivan:

- Sorti SR 34.97 pour vin SR 38.27 par erdtan pour tou travayer, eksepte bann ki pa anploye. Sa i veditr travay ki baze lo 35 erdtan par semenn, saler pou ogmante sorti SR 5,303.70 pour vin SR 5,804 par mwan apartir Zanvyé 2020.
- To lapey pour bann travayer ki pa anploye pou ogmante sorti SR 40.30 pour vin SR 44.10 par erdtan.

Lenpakt saler minimom pou ogmant saler bann 'Home Carers' ki travay a plen tan, sorti SR 6,060.60 pour vin SR 6,633.47 apartir le premye Zanvyé 2020. Saler bann 'Home Carers' ki travay a mitan pou ogmante sorti SR 3,787.35 pour vin SR 4,145.92. Sa i osi veditr en logmantasyon dan kontribisyon pansyon ki Gouvernman i fer pour bann 'Home Carers'. Zis sa logmantasyon pou kout SR 24 milyon pour finanse.

8.2 Logmantasyon dan bann Benefis ek bann Programm Aprove kot Lazans ek Proteksyon Sosyal

Msye Spiker, sa bann benefis pou ganny ogmante konm swivan:

- Benefis Retret pour bann dimoun aze, sorti SR 5,250 pour vin SR 5,750
- Benefis Envalidite ek Dezabilite, sorti SR 5,250 pour vin SR 5,750

8.3 Pansyon Minimom SR 1,000

Msye Spiker, i annan en kategori travayer ki pe resevwar mwens ki SR 1,000 par mwan, atraver Fon Pansyon. Apartir Zanvyé 2020, Gouvernman pe al enplimant en polisi ki a permet ogmant zot pansyon ziska SR 1,000 par mwan. Donk, ouvernman pou entrodwir en minimom pansyon SR 1,000 atraver Fon Pansyon. Sa i pou kout SR 4.8 milyon dan bidze 2020.

8.4 Pansyon Kategori Spesyal SR 500 pour en group retirete

Msye Spiker, parey Prezidan in anonse zour lafet travayer sa lannen, ti annan lezot zenerasyon travayer ki'n sibir bann kondisyon travay deplorab difisil e enzis. Se zot ki'n met fondasyon ki travayer ozordi i kapab kontinyen batir lo la, e se zot ki'n fer li posib pour nou ariv kot nou ete ozordi. Sa kategori travayer ti pran zot retrait bokou lannen pase, e ozordi, zot viv zis lo zot benefis retrait sekirite sosyal. Sa kategori pansyonner ti pran zot retrait avan Fon Pansyon ti ganny etablir. Zot pa ganny okenn lot pansyon ki egziste ozordi eksepte sekirite sosyal. Gouvernman in deside donn zot en sipor adisyonnal. Zot pou ganny en SR 500 adisyonnal par mwan, apartir Zanvyé

2020. Sa sonm, ki'n ganny bidzete dan bidze 2020 i ariv SR 12 milyon e i pou ganny zere par Lazans Proteksyon Sosyal.

8.5. Lasistans Deker ek 'Child Minding'

Msye Spiker, lasistans ki serten paran ki kalifye i gannyen avek Gouvernman pour deker ek 'Child Minding' pou ogmante sorti SR 500 pour vin SR 750 apartir 2020.

8.6. Propozisyon pour en alawenns pour bann manman ansent ki reste lo zil pros ki bezwen akous Mahe

An 2018, Sesel ti rikord 1,650 nesans vivan. Dan 66 nesans ki'n anrezistre pour Grand Anse Praslin, 40 nesans ti dan Lopital Sesel, e pour Baie Ste Anne 45 dan 69 nesans ki ti rikorde ti dan Lopital Sesel. La Digue ti rikord 45 nesans, e ladan, 36 ti lo Mahe. Bann manman anvwadfanmir lo Praslin ek La Digue i bezwen ganny transfer lo ward prenatal dan Lopital Sesel ler zot ariv 34 semenn, ziska ki zot akouse. Donk, sa bann manman in bezwen rod lozman alternativ ziska ler zot delivre. Swivan program parental ki ti fer lo Praslin, bann manman anvwadfanmir in eksprim konsern vizavi larzan ki zot bezwen kontribye pour lozman ler zot Mahe, vi ki sa i met en depans ekstra lo zot. Sa i met zot a en dezavantaz konpare avek bann manman ki reste Mahe, vi ki zot oblize reste Mahe pour sis semenn ziska ler zot akouse.

Bann manman anvwadfanmir ki sorti lo bann zil pros pour vin Mahe, pou ganny en alawenns fiks SR 1,500 pour siport zot depans lozman si zot bezwen rod lozman alternativ. Sa i a ganny fer atraver Lazans Proteksyon Sosyal.

8.7. Konze Anyel

Msye Spiker, Prezidan ti anons en lot mezir konsernan konze anyel zour Lafet Travayer. Parey ou konnen, tou travayer i ganny 21 zour konze koman konze anyel. Gouvernman in deside ki apartir Zanvye 2020, konze anyel pou vin 24 zour.

8.8. Ler Travay Fleksib dan Gouvernman

Msye Spiker, Gouvernman i bezwen emansip nou servis piblik pour fer li vin pli efikas e pli kapab rann kont. Pandan premye kar 2020, Gouvernman pou met striktir anplas pour kapab permet ler travay fleksib. Dan klima aktyel, nou tou nou komans travay 8er bomaten e fini 4er apremidi. Dan sa monn modern, e pour pli byen ankouraz prodiktivite, nou bezwen asire ki nou etabli en lanvironnman travay ki fer provizyon pour bann paran ki travay fer letan pour zot zanfan, pour bann profesyonnel kapab kontinyen travay letan ki zot pe etidye a distans, e pour fer letan pour en stil lavi pli an bonn sante atraver legzersis ek en ladyet balanse.

Ler travay fleksib i kapab permet travayer komans nenport ler ant 7er bomaten ziska 5er apremidi, e dan serten sirkonstans, travay kot lakour pandan serten peryod spesifik. Sepandan, lakantite erdtan travay pa pou sanze. Fodre note ki ler travay fleksib i depan lo kalite travay, bann bezwen sa departman pandan serten peryod lannen, e lenpakt lo lezot partiprenan. Sa pratik in deza met anplas dan serten lorganizasyon Gouvernman tel ki Komisyon Anti-Koripsyon, Lenstiti Nasyonal pour Teknolozi, Lasyans ek Linovasyon, e Labank Santral. Msye Spiker, en striktir a ganny met anplas pour asire ki tou anplwaye Gouvernman i swiv en prosedir ler travay fleksib.

8.9. Revi Skim Sibvansyon pour Lakaz

Msye Spiker, skim pour sibvansyon lakaz ti lanse an 2014. Sa skim ti ganny etabli pour amelyor akse konstriksyon abordab oubyen pour vin propriyeter ou prop lakaz pour en sekter lapopilasyon

spesifik. Pour kalifye pou sa lón, aplikan ti bezwen en sitwayen Seselwa ki anploye oubyen ki anploy son prop lekor, e ki annan en reveni fiks. Aplikan i bezwen osi pe vin propriyeter pou premye fwa. Sa sibvansyon i azout lo lón lakaz sa aplikan, e i pa bezwen repey sa. Okour bann lannen, in annan bokou sanzman dan pri konstriksyon ek lezot faktor ki anpes lamazorite Seselwa benefisyè avek sa skim. Donk, i annan en nesosite pou revwar sa.

8.9.1 Pour revwar ‘rate’ par met kare lo sa trwa zil prensipal

Depi in ganny met anplas, en ‘rate’ SR 7, 500 par met kare pe ganny servi pou kalkile lekel ki kalifye pou sa skim. ‘Rate’ aktyel i aplikab pou Mahe, Praslin ek La Digue. Sa ‘rate’ fiks pou tou le trwa zil pa pran an kont lefe ki kou konstriksyon i pli o lo Praslin ek La Digue, konpare ek Mahe.

Sa bann ‘rates’ pou ganny revize konm swivan:

Mahe: Komansman **SR 7, 500** par met kare ziska **SR 8, 500** par met kare

Praslin: Komansman **SR 7, 500** par met kare ziska **SR9, 500** par met kare

La Digue: Komansman **SR 7, 500** par met kare ziska **SR12, 500** par met kare

8.9.2. Pour enkli rekonstriksyon lakaz anba laplikasyon pou sibvansyon lakaz

Konmela, napa sibvansyon pou rekonstriksyon lakaz – sa i aplikab zis pou konstriksyon lakaz ek dezyenm konstriksyon. Si sa i ganny enkli, aplikan i ava kalifye pou ganny sibvansyon dan bann ka rekonstriksyon, par egzanp, dan ka kot in annan en dezans enpri tel ki dife, oubyen an term bann ki pe vin propriyeter pou premye fwa kan zot pe kas lakaz zot paran pou rekonstrir sa ki pou zot.

Sepandan, pou asire ki bann pert an rezilta dezans natirel ek dife i ganny redwir, Gouvernman i ankouraz bann propriyeter tre fortman pou asir zot lakaz e pey zot lasirans.

8.9.3. Pour enkli lavant later avek propriyete dan kriter pou kalifye pou sibvansyon lakaz

Msyè Spiker, konmela, napa sibvansyon pou aste lakaz ki’n fini fer avek son later, me plizyer aplikan in fer rapel pou sa ganny aprouve. Polisi pou ganny revize pou formelman enkli sibvansyon pou aplikan ki pe aste lakaz ek later.

8.9.4. Pour revwar nivo reveni pou kalifye pou sibvansyon lakaz

Msyè Spiker, dan polisi aktyel, bann endividi ki ganny en reveni ziska SR 5,999.00, i kapab benefisyè en maksimonm SR 200,000 sibvansyon. Avek bi pou fer benefis sa skim disponib pou bann dimoun avek reveni ba dan kad ‘Progressive Income Tax’, aplikan ki ganny en saler SR 8,555 pou aprezan kapab ganny sa maksimonm SR 200,000 sibvansyon.

8.10. Nimero Veikil Personalize

Msyè Spiker, apartir Zanvyè 2020, Gouvernman pou entrodwir en sistenm nimero loto personalize pou bann veikil dan Sesel. Sa nouvo sistenm pa pou konpromet lenplimantasyon lalwa trafik

oubyen lezot prosedir legal. Se pour sa rezon ki serten karakter spesifik ek sekans bann karakter pa pou ganny permet si zot fer nimero vin mwen lizib. En maksimonm 6 karakter pou ganny servi e sa prefix 'S' ki aktyelman dan lizaz pou nepli mandatwar pour bann nimero transpor prive. Stil lekritir, groser karakter, lespas ek lezot karakteristik plak nimero pou osi ganny mandate par lalwa. Kouler karakter ek kouler plak i reste parey sistenn aktyel. Tou karakter i bezwen an maziskil. Pri pour sa prosedir i konm swivan:

- Kategori 1: Zis bann karakter alfa SR 60,000
- Kategori 2: konbinezon karakter alfa ek karakter nimero SR 40,000
- Kategori 3: konbinezon karakter alfa ek karakter nimero SR 20,000
- Kategori 4: Bordir ki'n anbelir SR 10,000

Pou renouvle sa nimero veikil personnalize, i pou kout SR 1,000 par lannen.

Sa bann kategori veikil swivan pa pou ganny drwa montre en plak nimero personalize:

- Veikil Gouvernman ek lantrepriz Gouvernman;
- Veikil ki bann Misyon Diplomatik/Konsiler oubyen bann delege lenstitisyon enternasyonal i servi.

8.11. Nouvo Kategori Permi Travay

Msye Spiker, komela, GOP i SR 500 par mwan pour bann anlwaye ki pa Seselwa. I annan 4,733 anlwaye ki pa Seselwa e ki'n dan pei pour plis ki 6an. Avek bi ankouraz en program 'understudy' apropiye pour bann Seselwa evantelman pran sa bann pozisyon, Gouvernman pe al entrodwir de nouvo kategori pri pour GOP;

1. Pour anlwaye ki pa Seselwa e ki'n dan pei pour plis ki 6 an, fre pou ogmante sorti SR 500 pour vin SR 1,000 par mwan.
2. Pour anlwaye ki pa Seselwa e ki'n dan pei pour plis ki 10 an, fre pou ogmante sorti SR 500 pour vin SR 5,000 par mwan.

Sa nouvo pri pou vin aplikab apartir le premye Zanvye 2020.

Msye Spiker, zis pou note ki Gouvernman in entrodwir bann 'tax incentives' pandan 2018 pour ankouraz sekter prive fer provizyon pour formasyon nesaser, konm swivan;

- Total poursantaz dediksyon ki permet anba lakt taks biznes pour bann fre formasyon i 150% ki'n koute pour sa bann formasyon.
- Fre formasyon ki en biznes in sibir i ganny legzanmpsyon anba lakt taks pour reveni ek benefis non-monneter.

8.12. Legzanmpsyon Pansyon Prive anba Dezyenn 'Schedule' Lakt pour Taks Reveni ek Benefis Non-Monneter

Msye Spiker, en serten nonm anlwayer dan sekter prive pe investir dan pansyon prive, e bann anlwaye i benefisyen en pansyon adisyonnal kan zot pran zot retret. Nou pou amann dezyenn 'schedule' lalwa taks pour reveni ek benefis non-monneter pou enkli pansyon retret ki sekter prive i donnen pou fer ki napa taks lo sa pansyon.

8.13. Revi Benefis Non-Monneter anba katriyenm ‘schedule’ lakt pour Taks Reveni ek Benefis Non-Monneter

Katriyenm ‘schedule’ dan lakt pour Taks Reveni ek Benefis Non-Monneter i kontyen serten benefis non-monneter ki en anplwaye i kapab gannye dan kad son lanplwa, oubyen ki en asosye i kapab gannye an relasyon avek son performans travay. En anplwaye i devret pey Komisyon Reveni en taks ekivalan 20% valer bann benefis non-monneter ki sa bann anplwaye in benefisyé. Sa lakt i spesifye ki benefis non-monneter i devret ganny takse lo en ‘market value’ rezonnab, e ki en valer ki kapab takse i devret ganny mete lo serten benefis, tel ki lozman, repa, veikil ek alawenns pour ‘entertainment’. A ler aktyel, valer ki ganny mete lo sa bann benefis i tro ba, e pa reflekte bann kondisyon marse aktyelman, an relasyon avek kout bann benefis ki pe donner. En revizyon dan ‘rate’ ki servi ava ganny enplimante avek bi fer valer ki kapab takse lo sa bann benefis vin pli anliny avek ‘rate’ ki servi lo marse aktyel, e kot i apropiye, aplik sa ‘rate’ aktyel. Sa i a vin efektiv an 2020.

Adisyonnelman, Gouvernman fer legzanmpsyon pour bann fre medikal tel ki tes medikal an relasyon avek lanplwa travayer lokal ek etranze, apartir Zanvyé 2020. Sa pa devret ganny vwar koman en benefis vi ki sa anplwaye pa ankor aktyelman anploy sa travayer. I rekomande ki travayer i fer en tes medikal avan zot ganny anploye pour etabli si zot an eta pour fer sa travay e reste Sesel, donk sa pa pou ganny takse.

Pou osi annan legzanmpsyon lo taks ki peye lo benefis lasirans pour sa bann travayer apartir 2020. Sa i annan pour bi, ankouraz anplwayer pour asir lakaz, veikil ek konteni personel zot bann anplwaye an ka vol oubyen dife.

8.14. Taks lo Propriyete Imobilye

Msye Spiker, prozedlwa pour taks propriyete imobilye i anba konsiltasyon piblik. I pou pare pour ganny gazete an Novanm 2019.

‘Rate’ pou reste 0.25% ‘market value’ nenport propriyete imobilye ki kapab ganny takse. Sa taks i devret ganny peye avek Komisyonner Zeneral le 31 Desanm sak lannen, oubyen avan. Msye Spiker, sa bann kategori propriyete imobilye ki swiv pou ganny legzanmpsyon taks propriyete imobilye;

- a) ki servi koman rezidans e ki son propriyeter i en kontribiter taks ki’n marye avek en Seselwa, e ki son maryaz i ankor entak, oubyen ki vef/vev sa propriyeter; oubyen
- b) ki ganny konsidere koman later komersyal oubyen endistriyel.

Apré ki sa lakt in vin an operasyon, en rezidan ki pa Seselwa, e ki propriyeter en propriyete imobilye pour premye fwa, ki pe ganny servi koman rezidans, i kapab fer laplikasyon an ekri kot Komisyonner Zeneral pour ganny legzanmpsyon taks. Legzanmpsyon pour taks propriyete imobilye i aplikab zis dan premye lannen ki in ganny aste. Son lannen answit, sa rezidan ki pa Seselwa pou bezwen peye an vi ki i pey ‘stamp duty’ dan premye lannen.

8.15. Revizyon dan Alawenns Personnel pour Lapos ek Kourye ki san taks

Msye Spiker, konmela i annan en alawenns personnel SR 3,000 pour bann byen ki ariv Sesel par avyon ouswa bato atraver servis lapos ouswa kourye, ki napa taks lo la. Sepandan, napa limit lo lakantite fwa ki en endividi i kapab servi sa alawenns oubyen baypas nesosite pour prodwir en ‘Bill of Entry’. Vi ki i annan serten defayans dan prosedir pour efektivman sirvey sa bann aktivite,

sa in ouver laport pour labi e donk koz en pert dan reveni ki'n tre difisil pour kontrole. I osi enzis vizavi bann biznes ki pe pey taks ek lwaye, e ki pe donn loportinite lanplwa, konpare ek sa bann endividi ki pe profit lo sa bann defayans dan prosedir taks pour fer vini keksoz 'online' apre revann lo 'Facebook'.

Donk, apati Zanvye 2020, Alawenns Lapos ek Kourye Personnel ki napa Taks pou ganny redwir sorti SR 3,000 pour vin SR 1,500 e en fre ladwann SR 50 pou ganny entrodwir.

8.16. Revizyon dan Taks Veikil

Msye Spiker, plizyer resers ki'n fer in montre ki veikil elektrik i pli efikas, e donk kontribye dan rediksyon gaz lefedser ek lezot emisyon ki bann veikil ki mars zis lo masin konbistib entern i large. Dapre lezislasyon taks aktyelman, i annan zis VAT lo bann veikil elektrik.

Msye Spiker, avek bi ankouraz lizaz plis veikil elektronik, Gouvernman in deside pour reviz taks lo veikil apartir Zanvye 2020 konm swivan;

1. Ogmant taks lo veikil komersyal pour aliny li plis avek sa ki aplikab pour bann veikil prive;
2. Ogmant taks lo bann veikil konvansyonnel par SCR 25,000.
3. Revwar taks ladwann ki egziste aktyelman lo tou kalite veikil ibrid par lao 1600cc, pour fer li vin pli anliny avek sa ki aplikab lo bann veikil konvansyonnel similer;

Msye Spiker, nou pe osi travay avek SEYPEC pour entrodwir panel soler ouswa koneksyon lasarz elektrik lo stasyon petrol, pour permet bann propriyeter veikil sarz zot transpor lo stasyon menm.

8.17. Lamannman Ozone dan Regilasyon Proteksyon Lanvironnman 2010

Apartir Zanvye 2020, sa bann lamannman swivan dan Regilasyon Proteksyon Lanvironnman (Ozone) 2010 pou vin anfors pour fer provizyon pour ratifikasyon 'Kigali Amendment' dan Protokol Montreal. Gouvernman pou enpoz bann taks swivan lo lekipman refrizerater ki'n enporte ek bann gaz refrizerater:

- a) Pou napa taks lanvironnman lo gas/lekipman avek mwens ki 100 'Global Warming Potential' (GWP) pour ankouraz bann enportater pour enport lekipman ki 'ozone and climate friendly', an fezan sa bann lekipman vin pli bon marse.
- b) 5% taks 100-2000 GWP
- c) 8% taks 000-3000 GWP
- d) 10% taks 3000 e pli o.

Poursantaz lo GWP ava ganny kalkile par Ozón dan Minister Lanvironnman, Lenerzi ek Sanzman Klima, e pwen koleksyon taks i ava kot ladwann.

An plis, pou napa VAT lo lekipman ek gaz refrizerasyon avek mwens 100 GWP.

8.18. Sanzman dan striktir taks pour labwason alkalize

Koman parti polisi Gouvernman pour redwir lefe lalkol lo lasante nou nasyon, Gouvernman ti anons bann sanzman dan lafason ki labwason alkalize pe ganny takse aktyelman. Vi ki sa bann sanzman pou ekstansif e pou enkli en sanzman zeneral dan 'excise tax regime', Gouvernman i dan prosedir anmenn en konsiltan pour asire ki nou bann sistenm ki anplas i kapab soutenir sa sanzman. Vi ki sa i en legzersis konpreansif, i pou pran omwen en an avan nou kapab enplimant li. An vi lakantite letan ki sa legzersis pou pran, e pour asire ki i annan serten polisi anplas pour redwir labi lalkol, apartir le premye Zanvye 2020, taks lo lalkol pou ogmante par 10% dan tou kategori. Adisyonnelman, nou'n idantifye en trou dan sistenm kot bann fabrikater lokal ti pe klasifye ronm

ki'n prodwi lokalman anba "alcopops" vi ki i annan en 'rate' taks pli ba lo sa kategori. Apartir le premye Zanvyè 2020, deskripsyon "alcopops" pou permet zis labwason avek en volim lalkol 8% e par anba pour ganny klasifye dan sa kategori.

8.19. Reform Taks Biznes

Msye Spiker, pandan bidze 2019, plizyer lamannman kot i konsern proze 'Base Erosion Profit Shifting' in vin anfers depi le premye Zanvyè 2019. Sepandan, dapre rekomandasyon Linyon Ewopeen, nou bezwen fer plis lamannman dan seksyon taks biznes ki gouvèrn bann aktivite fabrikasyon anba 'International Trade Zone regime'. Nou annan lentansyon aplik en peryod 'grandfathering' pour sa peryod, avek bann lamannman, ki pa pou depas le 31 Desanm 2022.

Linyon Ewopeen in osi souliny serten konsern vizavi nou sistenm taks teritoryal, ki zot krwar i kapab fasilite doub 'non-taxation'. Zot in soulinyen ki i kapab annan reveni ki pa pe ganny takse okennpar. Nou pe travay ver finalizasyon sa de lamannman avan le 31 Desanm 2019, pour asire ki nou anliny avek metodoloji Linyon Ewopeen.

Msye Spiker, an Zanyè 2020, nou pou amann taks biznes lo bann lakour rezidansyel sorti 15% pour vin 3%. Msye Spiker, nou lans en lapel ek sekter prive pour pas en pe sa bann benefis lo zot bann lokater. Gouvèrnman pe fer son par pour redwir taks, me sekter prive osi i bezwen fer son par.

Msye Spiker, sistenm 'Pay As You Go' kot serten biznes i kapab tir 5% lo zot reveni 'at source', pou nepli egziste apartir Zanvyè 2020. Sa bann biznes ki enkli dan sa kategori i kontrakter konstruksyon, kontrakter menntenans, mekansiyen, sa ki lwe oubyen 'operate' 'plant' ek lekipman, e sa ki lwe pti bis.

Msye Spiker, parey mon ti anonse dan mon ladres bidze lannen pase, Gouvèrnman ti inisyè en revè taks biznes sa lannen avek bi senplifye li. Bi sa revè polisi lo taks konpreansiv sete pour get dan posibilite pour amelyor sistenm taks biznes dan nou pei, pour fer en evalyasyon endepandan, afon e konparativ nou sistenm taks biznes, e donk, fer en seri rekomandasyon vizavi polisi ki tre spesifik.

En seri konsiltasyon lo taks biznes ti ganny inisyè an Zilyet avek lasistans Lorganizasyon pour Korporasyon Ekonomik ek Devlopman (OECD). Plizyer dyalog ti fer ek bann partiprenan avek partisipasyon bann reprezantan divers lasosyasyon, minister, lazans Gouvèrnman e kominote biznes an zeneral. An Septanm 2019, en swivi ti ganny fer pour diskite rezilta sa konsiltasyon e inisyè bann propozisyon polisi avek Minister responsab pour Finans ensi ki avek bann divers partiprenan.

Dan konteks prozeksyon Taks pour 'GDP' i montre en pti deklinezon, sorti 32.1% an 2018 pour vin 32.3% an 2019 ek 31.6% an 2020. Parey OECD in soulinyen, sa i 'ratio' pli o ki annan parmi tou bann pei Lafrik ki detabes statistik reveni global OECD i kouven, ensi ki parmi lezot pti lekonomi zil ki depann bokou lo tourizm. Me sepandan, ler Sesel in mont dan ran bann pei avek reveni o, nou'n bezwen fer fas avek bokou defi vi ki i aprezan pli difisil pour ganny lasistans devlopman. Donk, nou bezwen amelyor e ogmant nou kapasite pour mobiliz nou bann resours domestik, ensi ki trouv lezot mwayen finansman pli inovativ, pour konble sa trou dan sours finansman. Pour asire ki nou pei i reste rezilyan vizavi bann sok, pour asir nou stabilite, nou

krwasans ek devlopman dan lavenir, sanzman klima, rediksyon risk dezaz, mankman dan lenfrastiktir devlopman, ansanm avek vyeisman nou popilasyon i merit vin bann pwen krisyel lo nou azanda. I tre enportan pour ranforsi nou sistenm taks vi ki posibilite pour bann lezot mwayen i relativman limite.

Sa i vedir ki okenn sanzman dan nou sistenm taks i bezwen ganny byen evalye pour asire ki nou krwasans pa ganny afekte, oubyen ki napa okenn lenzistis ki ganny kree dan nou rezim, e ki Gouvernman pa perdi reveni ki pou afekte nou bann bezwen bidzeter. An vi tou sa bann defi, Gouvernman i bezwen konsider en reform taks biznes ki pran sa bann faktor an konsiderasyon e enplimant en rezim ki pou senplifye nou rezim taks reveni pour bann lakonpanyen, redwir planifikasyon taks e amelyor koleksyon taks.

Sanzman pli enportan vizavi polisi se pour adres bann problemm depi kot zot sours, plito ki endirekteman atraver sistenm taks. Msye Spiker, pour bokou lannen, sistenm taks in ganny servi pour adres bann defi dan bann sekter partikilye. Sa in pran laform to preferansyel, legzanmpsyon oubyen ‘incentives’, ki anfenkont i zis deform nou baz taks. Dan lepase, nou’n osi donn ‘incentives’ pour ankouraz lenvestisman direk etranzer (FDI) e sey stimil serten sekter. Sa in mars byen. Me prezan i enportan ki nou revwar tousala pour determinen si se menm klima lenvestisman e menm defi ki egziste ozordi.

Rapor preliminar OECD in konfirman ki pli gro problemm avek nou sistenm taks se ki i debalanse. Savedir, serten sekter ek biznes i kontribye en kantite, tandis ki en bann i kontribye tre pe akoz bann to preferansyel ek bann dediksyon ki zot gannye. Par egzanzp, data 2017 i montre ki selman 39% bann lakonpanyen anba Taks Biznes ti annan en ‘tax liability’ pozitiv.

An plis, zis 10% bann lakonpanyen ki’n kontribye 96% total taks biznes, ou alternativman, zis 30 lakonpanyen ki’n kontribye 80% total taks biznes ki’n ganny peye. Apepre lanmwatye dan totalite bann lakonpanyen, savedir 717 lakonpanyen, in raport en ‘zero tax liability’. Sa se akoz bann gro porsyon taks ki ganny dedwir e ki redwir reveni ki kapab ganny takse dan en valer negativ. An retour, sa i koz bann pert dan taks ki kapab ganny ‘carried forward’.

Komers an gro e an detay ensi ki servis leberzman ek manze i de sekter ki raport pli gro poursantaz pert. Pour 2017, 77% bann lakonpanyen dan komers an gro ek an detay in raport en pert, e 66% dan servis leberzman ek manze.

Sa rapor i osi konfirman ki servis leberzman ek manze, ki reprezant 15% valer azoute, e 41% VAT ki anmase, i kontribye zis 7% dan total reveni taks biznes. Sa i prensipalman an rezilta bann taks preferansyel ki sa sekter in gannye, ensi ki bann taktik ki bann pli gran operater dan sekter tourizm i servi pour evit taks. Par egzanzp, 44 lakonpanyen dan sekter tourizm ti raport bann dediksyon depresyasyon ki plis ki 50% ‘turnover’ ek zero poursantaz taks ki bezwen peye. An plis, bokou lakonpanyen dan sa sekter i raport bann depans operasyonnel egzorbitan ki pa an porsyon avek zot nivo ‘turnover’.

Sa i akoz lakt pour taks biznes i permet en ‘rate’ depresyasyon akselere lo lenvestisman kapital apard ki batiman, ki ariv ziska 145% dan 5 an, pour bann biznes ki annan pour fer avek tourizm, ensi ki lagrikiltir ek lapas, konpare ek lezot sekter. An plis ki sa, bann lotel i zouir en ‘rate’ depresyasyon 20% dan premye lannen taks, e 10% pour sak lannen taks ki swiv.

Dezyenman, sekte enfomel i osi reprezant en defi. Dan sa ka, pour adres sa enfomalite e agrandi lakantite sours reveni taks i devret vin en priyorite pour evite met tro bokou fardo lo bann operater dan sekte formel, e anpes konpetisyon debalans. I enperativ ki nou pa konsider ogmant taks dan sekte formel pour ganny plis reveni. Okontr, nou devret elarzi nou labaz sours taks atraver sekte enfomel, tandis ki nou gard lakantite taks dan sekte formel a en nivo rezonnab.

Msye Spiker, Gouvernman pe alor konsider rebalans fardo taks biznes. Parey OECD in rekomande, nou kapab atenn sa an besan lakantite taks lo bokou operater, me an ogmantan nivo taks lo bann ki aktyelman pe kontribye ensifizaman dan koleksyon reveni.

1. Sa bann mezir swivan pou ganny entrodwir dan kourt term:

- Entrodwir bann mezir proteksyon labaz taks ‘corporate’ lo nivo enternasyonal, ki enkli regilasyon transfer pri, regilasyon limitasyon lentere, e regilasyon pour lakonpanyen etranze kontrole.
- Fasilit lobzervasyon regilasyon taks e ranforsi kapasite verifikasyon dan ladministrasyon taks an partikilye par:
 - a. Ankouraz e fasilit fayling elektronik pour taks;
 - b. Mentenir ‘Presumptive tax’, koman en taks senplifye pour bann tre pti, pti ek mwayen lantrepriz, e fer li mandatwar ki bann biznes ki raport anba ‘presumptive tax’ pour donn en minimonm lenformasyon (lo saler, lizaz karbiran, eks) pour ki ladministrasyon taks i a kapab verifye si sa bann biznes pe ‘under-report’ zot ‘turnover’;
 - c. Asire ki staf ladministrasyon taks i adekwat;
 - d. Entrodwir en sistenm lodit otomatik ki baze lo risk.
- Etabli en regroupman plizyer partiprenan avek reprezantan diferan minister, lorganizasyon piblik ek reprezantan sekte prive, avek bi pour adopte en stratezi pour adres bann ka enfomalite ki egziste, partikilyerman dan serten sekte parey tourizm.
- Alawenns pour taks depresyasyon ki pli spesifik vizavi son target, atraver restriksyon zot lizaz eksepte dan ka bann aki prodiktiv ki’n spesifye, ek kapital ki efikas vizavi lenerzi. Pour lezot aki, mentenir depresyasyon akselere, me selman ziska 100% kou lenvestisman.
- Retire oubyen diminye bann legzanmpsyon taks pour karbiran ki ankor egziste (eksepte pour sa ki donn servis leberzman ki pa konekte ek ‘grid’ PUC)
- Entrodwir en sonm fiks anyelman koman en fre pour serten aktivite tel ki pour peser ek artis. Saverdir, olye ki bann dimoun ki anploye dan sa de sekte i pey taks reveni, zot pou bezwen pey en pri fiks anyelman. Sa i ava amelyor e fasilit peyman pour sa bann sekte partikilye.

2. Bann priyorite mwayen term:

- Komans prosedir renegotyasyon dan kad sa 28 trete taks doub (DTAs) ki pa pe anpes lerozyon labaz sifizaman.
- Armoniz e bes ‘rate’ taks biznes atraver lentrodiksyon en nouvo ‘schedule’ pour ‘rate’ taks biznes ki aplik pour tou biznes. Sa i ava osi enkli tou biznes ki aktyelman pe ganny takse anba bann ‘rates’ taks biznes regilye, tel ki sekte tourizm, lapes, CSPs; me sa i eksklir sekte ‘high end’, ki pou inisyman kontinyen ganny takse lo bann ‘rates’ ki egziste deza. Sekte ‘high end’ i konpri bann lakonpanyen servis telekominikasyon, labank, lakonpanyen lasirans, lakonpanyen ki manifaktir sigaret ek lalkol. Enn fwa ki bann

lezislasyon i anplas, ki ava permet nou agrandi nou labaz taks pli byen, sa bann kategori osi pou alinyen. Bann nouvo 'rates' taks biznes ki'n ganny armonize i kapab par egzanp, vin konm swivan: 15% ziska profi ki ariv SR 1 milyon; e 25% lo profi par lao SR 1 milyon. Ler nouvo 'rates' taks biznes pe ganny etabli, nou bezwen pran an kont bann devlopman lo lasenn enternasyonal vizavi taks.

Msye Spiker, si nou entrodwir en 'flat rate' 15% pour taks biznes, sa pou reprezant en pert enportan pour gouvènmman. I pou reprezant en pert lo reveni apepre 1.7% nou GDP oubyen 0.8% pert reveni an term GDP si sekter 'high end' i ganny ekskli.

Lanaliz ki'n fer i alor sizere ki nou devret konplèmant sa 'rate' taks 15% avek en 'rate' 25% ki merit ganny takse lo tou profi par lao R 1 milyon, ki a fer sa reform vin net vizavi reveni si i ganny enplimante korekteman.

'Rates' progresiv i osi permet ki bann biznes ki pe deza pey 15% pa ava redwir zot lenvestisman. Adisyonnèlman, sa i ava antrenn en rediksyon enportan dan 'rate' taks biznes ki a donk kree lankourazman nesese pour fer lenvestisman. I ava redwir 'rate' taks lo pti biznes konsiderableman, ki aktyelman pe ganny takse lo en 'rate' tre o anba rezim normal.

- Ogmant 'cash accounting limit' pour biznes taks ziska SR 2 milyon, dan plas sa limit SR 1 milyon ki anplas aktyelman. Savedir, permet bann biznes avek en reveni ziska SR 2 milyon ganny opsyon pour raporte lo en baz 'cash'. Sa i en fason senplifye pour raport lo performans en biznes.
- Konsider en taks lo reveni kapital si 'rates' taks biznes i ganny redwir e i anliny, pour evit distorsyon e redwir lenzistis. Sa i akoz reveni kapital endividyel i ganny takse pli lezerman ki ki reveni travay.
- Fer 'Tourism Marketing Tax' (TMT) ek taks Responsabilite Sosyal pour bann lakonpanyen (CSRT) pli kapab donn kredi kont taks biznes, e gradyelman 'phase out' sa bann taks.
- Amelyor laform 'Progressive Income Tax rate schedule'
- Enplik bann platform elektronik dan koleksyon VAT lo bann servis touristik e dan koleksyon lenformasyon ki annan pour fer avek bann tranzaksyon ki zot fasilite.

Msye Spiker, gouvènmman pou kontinyen angaz li avek bann partiprenan relevan, e i annan bi finaliz sa reform enportan lannen prosen. Sa bann reform i bezwen ganny fer par faz, avek en lapros konpreansiv, parske lenplimantasyon sa bann reform i demann bokou planifikasyon ek preparasyon.

9. LEZOT REFORM EK LOPORTINITE DAN BANN SEKTER KLE

9.1. Devlopman Sekter Finansyel

Msye Spiker, Gouvènmman i reste angaze pour amelyor striktir zirisdiksyon Anti-Blansisaz Larzan e pour Lit Kont Finansman Terorizm (AML/CFT). En Komite nasyonal in ganny apwente pour amelyor kordinasyon nasyonal e asire ki bann defayans ki'n note dan 'Mutual Evaluation Report' i ganny adrese atan. Draf sa prozedlwa in ganny sirkile avan nou konmans konsiltasyon avek bann partiprenan, e i ekspekte ki prozedlwa i a ganny gazete ver lafen Novanm 2019. Sa lalwa i a fer provizyon pour permet en lapros baze lo risk vizavi sipervizyon. Adisyonnèlman, i pou asire ki

bann rekomandasyon neser anba standar ‘Financial Action Task Force (FATF) i ganny enkli dan striktir regilatwar. Sa komite pe osi revwar lakt ki kouver gen ki’n atenn atraver krim ek lakt ki kouver prevansyon terorizm, avek lentansyon Governman pour prezant lezot lamanman dan sa de lezislasyon dan premye mwatye 2020.

Msye Spiker, bann veikil ‘corporate’ tel ki lakonpanyen, bann ‘trusts’, bann fondasyon, bann partenarya ek lezot kalite antite legal ek laranzman i fer en gran varyete aktivite komersyal e antreprenen. Sepandan, malgre rol esansyel e lezitim ki bann veikil ‘corporate’ i zwe dan lekonomi global, anba serten kondisyon, zot in ganny servi pour bann aksyon ilegal. Pour konbat sa aktivite ilegal, latransparans vizavi propriyeter legal ek lezot laranzman i krisyel pour proteksyon sistenm finansyel enternasyonal. Plizyer lorganizasyon enternasyonal tel ki G8, G20, FATF ek OECD, in pran aksyon konkret pour promouvwar latransparans dan konteks propriyeter legal ek bann laranzman ki benefisye dan sa bann aktivite. Latransparans vizavi lenformasyon lo propriyeter legal e akse avek sa lenformasyon par lotorite relevan i bann mwayen enportan pour prevansyon frod, move kondwit, blansisaz larzan, finansman terorizm, evazyon taks, pran oubyen donn gous, koripsyon ek lezot krim serye. Msye Spiker, dan sa konteks, nou pe finaliz en prozedlwa ‘Beneficial Ownership’ pour nou konmans prosedir konsiltasyon avek bann partiprenan avan nou finalize. Sa i pou en nouvo lezislasyon pour fer provizyon pour idantifikasyon ek verifikasyon ‘beneficial ownership’ bann antite legal ek bann laranzman legal, e osi en letablisman en databes santral pou rikord lenformasyon ki ganny anrezistre lo bann antite legal ek bann laranzman legal, dan Sesel, avek bi pour promouvwar latransparans kot i konsern ‘beneficial ownership’ e pour rezon koneksyon.

Gouvernman in donn resours adisyonnal dan bidze 2020 pour bann lazans ki anfers lalwa ek bann lotorite regilatwar, pour asire ki pei i amelyor son kapasite pou konbat blansisaz larzan e terorizm e asire ki i annan en striktir efektiv pour ‘AML/CFT’ dapre plan nasyonal.

Labank Santral pe kontinyen dan son zefor pour moderniz sistenm nasyonal pour peyman, pour efekte bann fasilite peyman pli efikas, konvenyan, fyab e abordab. Koman en pilye santral Plan Enplimantasyon pour Devlopman Sekter Finansyel, en sistenm nasyonal pour peyman ki efikas e efektiv i kontribye dan en fason kritik pour etabli en fondasyon solid pour devlopman FinTech, an agrandisan posibilite pour bann pti e mwayen lantrepriz eksplwat bann vid lo marse, e pour devlop e konsolid konfyans piblik dan sistenm finansyel. I osi servi pour anmenn krwasans bann peyman inovativ, non selman dan perspektiv bann itilizater, me osi dan perspektiv lezot parti konsernen dan ‘value chain’, par egzant, marsan, ki donk asir lenklizyon finansyel dan tou son laspe.

Se dan sa loptik ki Labank Santral pe kontinyen angaz avek bann partiprenan relevan, pour enplimant en lenfrastruktir peyman ki ava reponn a bann bezwen pei ensi ki bann defi ki i pe fer fas avek, e asire ki person pa ganny kit deryer. Swivan bann letid dyagnostik ki’n entrimantal dan formasyon konsepsyon modernizasyon sistenm peyman nasyonal, Labank Santral, an etrwat kolaborasyon avek son bann partener kle pe aprezan finaliz bann detay teknik pour lenplimantasyon lenfrastruktir teknozik ki neser e kree lanvironman apropiye pour lekonomi elektronik. Tandis ki proze modernizasyon i konpreansiv e long term par natir, an vi neserite pour

lamannman lezislattiv, e neseseite pour kontinyen avek program literasi finansyel, lenplimantasyon sa lenfrastruktir teknolojik ki nesese i ekspekte konplete ver lafen 2022.

9.2.Devlopman Sekter Prive

Msye Spiker, pour 2020, Gouvernman pou kontinyen siport bann divers skim biznes konm swivan;

- SR 3 milyon pour Fon Devlopman Lagrikiltir, atraver DBS
- SR 5 milyon pour ‘Youth Employment Scheme’ (*Skim ‘Mon Premye Dyob’*),
- SR 1 milyon pour Skim Lantrperenarya Lazenés (*YES*)
- SR 25 milyon pour skim bann pti ek mwayen lantrepriz (*SMEs Scheme*)

Msye Spiker, Lenvestisman Direk Etranzer pour lannen 2019 in ganny prozekte pour ariv USD 327.9 milyon, pli gro sif depi 2015. Depi Zanvyé ziska Septanm 2019, Bord Lenvestisman in tret lavalé SR 10.7 bilyon lenvestisman. Msye Spiker, Sesel in sorti 96 pour al lo 100 dan rapor ‘Doing Business’ pour 2020. Sa i pa akseptab. Lobzektif se pour Sesel ganny konte dan premye senkant pandan sa prosen trwa-z-an. En plandaksyon ki detay bann mezir nesese ki nou bezwen pran dan sa peryod 2020-2022 pe ganny devlope e sipoze konplete ver Desanm 2019. Son lenplimantasyon a ganny swiv par en komite ‘High-Level Ease of Doing Business’ ki enkli reprezantan sekter prive. Striktir lenvestisman pei pe osi ganny revwar par UNCTAD ki pe fer provizyon nesese pour lasistans teknik, pour revwar polisi lenvestisman.

Msye Spiker, an vi bann gran proze nasyonal ki’n ganny idantifye pour ganny enplimante atraver partenarya Piblik-Prive, Gouvernman pou soumet prozedlwa Partenarya Piblik-Prive ver milye Novanm 2019, pour laprouvasyon Lasanble Nasyonal. Prosis pour ‘project initial screening’ ki enkli son ‘feasibility study’ ek prosedir ‘procurement’ in ganny detaye dan sa prozedlwa. Adisyonneman, zesyon lagreman partenarya piblik-prive pour protez toulede, investiser ek gouvernman, in osi ganny detaye dan sa prozedlwa. Enn fwa ki gouvernman in resevwar laprouvasyon Lasanble Nasyonal, nou swete ki sekter prive i ava pran loportinite ki sa nouvo striktir i ofer pour partisip dan bann gran proze gouvernman.

Msye Spiker, premye proze ki gouvernman pou tennder dan premye mwatye 2020, an servan sa striktir, i proze konblaz 18 ektar later lo Ile Aurore. Sa lenvestiser pou ganny envite pour partisip dan lapeldof pour devlopman en proze touristik lo Ile Aurore. Sa investiser pou bezwen pey en kapital inisyal pour lwe sa later. Sa peyman davans ava ganny servi pour konble sa later e met lenfrastruktir nesese lo Ile Aurore pour fasilite konstruksyon lezot lenfrastruktir sosyal. Lavantaz sa proze devlopman touristik lo Ile Aurore se ki i pou konplemant sa fasilite sant konferans 1,000 syez ki pou ganny konstrir dan term mwayen atraver en ‘grant’ gouvernman Lenn. Sa i ava kree loportinite pour bann gran konferans ganny organize isi Sesel, e donk ouver posibilite pour sekter prive.

Anliny avek konseps devlopman ki Konsey Minis in aprouve koman parti rekiperasyon ‘Societe Seychelloise d’Investissement Limited (SSI)’; SSI, an konsiltasyon avek diferan partiprenan in koman konseps devlopman pour bann sit dan Beau Vallon ki koni koman sit regata. Bazar labrin pou aprezan vin en levennman kotidyen, e sa pou efektiv aparti Zen 2020. En sonm SR 1.5 milyon in ganny enkorpoze dan bidze 2019 pour konstruksyon bann kyosk. Sa bann kyosk ava ganny konsevwar pour melanz byen avek lezot batiman ki’n propoze, e Lazans Lantrepriz

Sesel ava lwe sa bann fasilite avek bann vander Bazar Labrin. Sa devlopman i osi konpri en kompleks sport ‘multi-purpose’, ki pou ganny finanse atraver sponnser. Batiman komersyal SSI, ki pou ouver tar an 2020, pou reflekte larsitektir Seselwa e pou konpri en ‘food court’, biro lapolis, stoudyo ladans, bann lofis, diferan labank, magazen, kafetarya, galeri lar ek mize ek lezot servis. Fodre note ki Regata oubyen okenn lezot levennman nasyonal pa pou ganny afekte par sa devlopman.

Msye Spiker, Lotorite Zón Endistriyel in ganny en bidze SR12.2 milyon. Sepandan, ‘pipeline’ pour lenplimantasyon proze i konm swivan;

- Zón 6 SR 32.9 milyon
- Zón 20 SR 64.0 milyon
- Zil Eve SR 30 milyon

Nou pe travay avek Lotorite Zón Endistriyel an 2020 pour ki i vin en lantrepriz etatik dan dezyenm mwaye 2020, pour asire ki sa nouvo antite i kapab lev fon nesese pour finans lenfrastruktir ki bezwen. Tou later dan zón endistriyel pou ganny transfer anba sa nouvo antite pour ki valer sa later i a kapab servi koman kolateral. Sa i ava en lot loportinite finansman pour bann labank.

Msye Spiker, parey in deza mansyonnen dan bann lannen presedan, Gouvernman pe finaliz bann lamannman ‘Public Procurement Act’. Pandan konsiltasyon avek bann partiprenan, sekter prive in reitere lo nesese pour protez e ankouraz plis partisipasyon lokal, espesyalman dan bann gran proze lenfrastruktir. Koman parti bann lamannman, younit ‘procurement oversight’ pou travay lo en polisi preferans oubyen rezervasyon pour definir klerman;

- a) group ki pe ganny targete e bann kriter pour ganny swazir;
- b) poursantaz preferans oubyen rezervasyon, kot i aplikab;
- c) peryod pour loperasyon en skim; e
- d) bann lobzektif sa bann preferans ouswa rezervasyon, e mwayen evalyasyon zot efektivite pour atenn zot lobzektif.

Sa i ava permet pli partisipasyon lokal e kree plis loportinite pour sekter prive dan bann gran proze lenfrastruktir.

Msye Spiker, fodre admet ki nou ankor ganny konplent sorti kot kontrakter ek bann operater servis, ki zot pa pe resevwar zot peyman a tan. Ansemoman, nou annan en polisi depans ek peyman anplas ki definir kantite letan ki gouvernman i pran pour efektye peyman. Dapre sa polisi;

- i. pour tranzaksyon komersyal (pour aste bann byen ek servis) ‘invoice’ i devret ganny peye dan 10 zour travay (oubyen 14 zour kalandriye).
- ii. pour bann proze kapital ki relativman pti, fodre pa depas 10 zour travay (oubyen 14 zour kalandriye). Sa i a donn sifizaman letan pour sa lazans ki pe enplimant proze fer lenspekasyon.

- iii. pour bann gran proze lenfrastruktir, fodre pa depas 15 zour travay (oubyen 21 zour kalandriye).

En lentere 0.05 poursan par zour pou ganny enpoze lo okenn peyman ki pa ganny fer pandan sa peryod letan ki'n spesifye, lo total sa 'invoice'. Msye Spiker, plis program sansibilizasyon i bezwen ganny met anplas dan gouvènmman pour asire ki 'checklist' i ganny observe konmilfo avan okenn peyman i gny anvoye kot 'accounts', ki a limit lakantite kekyon ki leve lo en 'invoice'.

Vi ki bidze in vin pli gro, Trezor pe tret an mwayenn, 300 a 400 'vouchers' par zour, e apepre 500 a 600 dan lafendimwan. An Desanm, sa i ariv an mwayenn 900 'vouchers' par zour dan bann dernyen zour avan bidze i fermen.

Prosedir peyman i normalman pas dan trwa staz. Premye staz i a letan ki en minister oubyen lazans i pran pour travay lo en tranzaksyon, depi prosedir 'procurement', ziska lotorizasyon entern pour fer peyman. Dezyenm staz, se letan ki pran enn fwa ki en minister oubyen lazans in soumet son peyman kot Trezor pour ganny peye. Trwazyenm staz, se letan ki pran pour Labank Santral transfer larzan dan kont komersyal sa vander. Msye Spiker, staz enn, kot bann minister ek lazans i it ret son bann 'invoice' i pran plis letan. Ler Trezor i resevwar en 'invoice', i annan trwa zour pour efekte peyman, dapre polisi peyman ek depans. Sepandan, an pratik, Trezor i efekte peyman landmen ki i'n resevwar en 'voucher', tandis ki Labank Santral i kapab efekte peyman dan kont komersyal vander imedyatman.

Msye Spiker, Gouvènmman i rekonnèt ki plen pti kontrakter ek pti biznes Sesel i fer fas avek bann defi likidite. Idealman, en antreprenèr i bezwen fer sir i annan sifizaman finansman, avan ler i angaz li dan en biznes. Sepandan, sa i pa le ka pour bann tre pti, pti ek mwayen lantrepriz vi ki zot rankontre bokou difikilte pour ganny finansman avek labank komersyal si zot pa arive ganny ase garanti, e vi ki zot pti, finansman kapital travay i kapab kout zot tre ser. I i reprezant en gro fardo pour gouvènmman vi ki bann 'suppliers' i normalman met presyon pour ganny peye toudswit malgre ki i annan en polisi peyman anplas, ki asire ki bann prosedir entern i ganny swiv avan ki okenn peyman i ganny fer.

Donk, dan en zefor pour asiste bann pti kontrakter vizavi zot bann defi likidite, ki normalman i afekte realizasyon bann pti proze kapital, Gouvènmman pe al entrodwir en 'Mobilization Advance Payment' (MAP) pour bann kontrakter klas III ek IV pour proze ki ariv ziska SR750,000.00. MAP i en peyman monneter ki pou ganny entrodwir, e i pou fer par minister anver kontrakter pour bann depans inisyal an sa ki konsèrn mobilizasyon sit, ek en proporsyon zis bann fre preliminar. MAP pou ganny elarzi pour kouver kontrakter klas III ek IV ki annan en bon rikord, e i pou bezwen laprouvasyon Departman Finans pour kapab ganny sa fasilite. Pou napa en garanti bond lo sa davans. I pou konpri en peyman inisyal 20% lo pri kontra, e pou ganny peye avek kontrakter avan okenn travay fizik i komanse. Sa fasilite san lentere i annan pour bi donn bann pti kontrakter motivasyon neser pour anboufte zot kapital travay, permet annan en lenpakt pozitiv lo zot 'cash flow' e permet zot pli byen mobiliz bann meyer resours, ki a retour ankouraz kontrakter pour konplet proze a ler e lo en bon nivo. Sa nouvo prosedir pour ganny gide anba en lankadremman.

Dan ka lezot klas kontrakter e pour proze par lao SR750,000, zot kapab touzour ganny en davans normal ki kapab ganny negosye dan zot kontra, avek en garanti bond.

10. PROZE ZIL PROS

Msye Spiker, sa bann proze spesifik ki swiv in ganny en alokasyon dan bidze 2020 pour bann proze Zil Pros;

- Rekonstriksyon kordgard La Digue SR 6.7 milyon
- Rekonstriksyon Lopital La Digue SR 5.7 milyon
- Rekonstriksyon Lekol La Digue SR 4.7 milyon
- Rekonstriksyon kordgard Baie Ste Anne Praslin SR 3 milyon
- Amelyorasyon laplenn zwe Praslin SR 2.0 milyon
- Proze semen atraver SLTA
 - Travay amelyorasyon St Sauver Praslin SR 1.5 milyon
 - Travay lo trotwar Cote D’Or Praslin SR 1 milyon
 - Koko Ibrid La Digue SR 2.5 milyon
 - Pension Michel La Digue SR 1 milyon
 - Agrandi semen Salazie Baie Ste Anne SR 2 milyon
 - Vanilla Road La Digue SR 1 milyon
 - Kontinyasyon semen Pasquere Praslin SR 4 milyon
 - Proze resirfas semen beton lo La Digue SR 4 milyon, ki enkli dezyenm faz semen Boule De Neige.

11. LANTREPRIZ PIBLIK

Msye Spiker, gouvènmman in prevwar SR 159 milyon dan bidze 2020 budget pour sibvansyon lantrepriz piblik. Sa i enkli US\$ 6 milyon pour Air Seychelles ki pou ganny transfer anyelman pour sa prosen senk an apartir 2019 ziska 2023. Gouvènmman pou angaz li pour permet ganny en garanti labank lavalèr US\$ 30 milyon bann ‘Preference shares’ an faver ‘shareholder’ Etihad, baze lo bann det ki Air Seychelles in akimile vizavi Etihad pandan sa bann dernyen lannen. Sa i a ogmant ‘debt-GDP ratio’ par 2%.

Nou’n fer en provizyon SR 50 milyon ek SR 21.7 milyon anba sibvansyon lantrepriz piblik ek bann ‘grant’ devlopman, respektivman pour SPTC. Msye Spiker, gouvènmman an partenarya avek Labank Mondyal pou travay apartir 2020 ziska mwayen term, pour sa bann eleman swivan;

1. Devlopman Polisi gouvènmman ek en ‘framework’ 5 an pour provizyon transpor piblik dan Sesel;
2. Revwar rezo semen ki SPTC pe kouver aktyelman, enkli kapasite, nivo servis e diferansyasyon prodwi;
3. Ranforsi striktir SPTC enkli son kapasite ek prosedir, pour delivre rezo ki’n ganny revize dan sa letan ki’n agree ;
4. Evalye fezabilite bann opsyon pour partisipasyon bann operater sekter prive dan servis transpor piblik dan Sesel, enkli idantifikasyon bann ‘entry point’ potansyel ek mezir sipor pour sa tranzisyon.

12. RESANSMAN POPILASYON EK LOZMAN 2020

Msye Spiker, pandan 2020 i pou annan en resansman popilasyon ek lozman par Biro Nasyonal pour Statistik. Sa legzersis pou kontribye dan disponibilite en seri sekans letan ki fyab pour data debaz demografik e sosyo-ekonomik ki neser pour formilasyon, swivi ek evalyasyon bann plan

ek program devlopman sosyo-ekonomik. Lobzektif imedyat sa proze pou ganny organize otour sa peryod resansman ki pou kouven en peryod set zour tar dan Out ziska boner an Septanm 2020. Kout total pour Resansman Popilasyon ek Lakaz 2020 i ekspekte ariv SR 13.1 milyon aköz pour premye fwa, sa resansman pou dan laform elektronik. Donk, Biro Statistik i ekspekte aste apepre 700 tablet pour antreprann sa legzersis. Aktyelman, i annan apepre SR 6.2 milyon dan bidze 2020 pour Resansman Popilasyon ek Lakaz. Sa ki reste i a ganny finanse atraver fon COMESA ek sipor bann lakonpanyen telekominikasyon.

13. KONKLIZYON

Msye Spiker, sa bidze ki Gouvernman in propoze pour konsiderasyon Lasanble Nasyonal, pou permet Seselwa pran bann loportinite ki annan, pour ki ansanm, nou kapab batir sa pei e anmenn li ver en krwasans soutenab dan long term.

Mon konnen ki malerezman, nou pa'n kapab enkli tou keksoz ki'n ganny demande swivan bann konsiltasyon, vi ki nou resours i pa san limit. Me mon konvenki ki sa ki nou'n fer provizyon dan bidze 2020 pou ouver posibilite pour plis loportinite krwasans dan bann diferan sekter, tandis ki koman en pei, nou reste rezilyan.

Mon ti a kontan remersye toulmonn ki'n kontribye anver preparasyon sa bidze.

An premye, mon remersye Prezidan Larepublik pour son sipor ek gidans ki i'n donn mon minister pour permet nou pous devan nou zanda reform ek polisi.

Mon ti a kontan remersye osi mon bann koleg minis ek zot lekip respektiv.

Mon remersye mon staf dan Minister Finans, Komers, Lenvestisman ek Planifikasyon Ekonomik ki'n travay tre dir. Mersi pour zot profesyonnalizm, dedikasyon, e sakrifis pour byennet e sikse nou pei.

Lo sa not, mon osi remersye Gouverner Labank Santral ek son lekip pour sa kolaborasyon tre pros ant polisi monneter e fiskal pandan lannen 2019 e dan preparasyon bidze 2020.

Mon lapresyasyon i osi al pour bann operater sekter prive, bann lorganizasyon sosyete sivil, lorganizasyon enternasyonal e tou lezot partiprenan pour zot sipor dan formilasyon bann polisi pour lavenir nou pei.

Adisyonnelman, Msye Spiker, mon remersye ou ek tou manm Lasanble Nasyonal ek son staf, pour zot sipor ek kolaborasyon pandan lannen antye.

Mon ti a kontan remersye pep Seselwa pour zot kouraz e pour sipor ki zot donn Gouvernman dan zefor pour anmenn nou pei pli devan.

Aprezan, mon soumet Prozedlwa pour Bidze 2020, ki ariv Nef bilyon, de san katreven douz milyon, katreven wit mil, e de san swasannde roudi (SR 9,292, 088,262) pour laprouvasyon Lasanble Nasyonal.

Mersi Msye Spiker.